

封邱縣續志

王廣慶題

封邱縣續志卷十四

官績略

略一

溝

知縣孫琰字允璞號沛霖直隸順天宛平進士康熙五十三年任創建義學發倉賑災捐俸脩城蠲免署內濫支每於朔望講約環聽者咸集率皆感化因之里俗仁厚爭訟幾息去官之日士庶攀轅挽留且爲之立碑致思

本該知縣去思

碑墓碑現存縣北關完全小學校

知縣曾興柱湖北雲夢進士乾隆十七年任學問淵博存心仁慈會值陽橋決口淹封邱辛口等八社興柱籌款賑濟力請豁免差徭拯救災黎迨甲戌歲年穀豐登人民樂業乃捐俸倡脩儒學以勵士氣後以病卒於官

本縣文光名宦題名

案知縣駱文光同治十三年蒐選清代名宦撮其事略題名勒石篋諸
正義書院學古堂後北屋之壁謂自耿紘祚至陳所蘊中間七十餘年
官易數十其中之賢者不及時以記之將恐久而失考因錄中丞賈漢
復方伯江蘭知縣王開期宋翔余縉屠粹忠岳峯秀王賜魁杜時萼孟
鏐耿紘祚曾興柱陳所蘊蔣萬寧馬際泰郭景偁等十六人然紘祚以
前諸人已見舊志茲不重載以後五人之善政仁澤足垂不朽者賴有
此碑之存不然雖龔黃之治亦終歸湮沒也然則駱令之識大體關心
文獻於此足見一斑矣

主簿江某乾隆二十五年任是時公廨久廢歷任諸官奉職奔走苦無定居江

乃提倡建署商之縣令相度形勢得地於黃池南岸大堤北坡黨將軍廟之西偏請准上憲首出已俸濟以捐款鳩工庀材建房六十餘間外繞桃梨棗杏千株饒有花縣風味尤於黃池灘地植官柳種蒲葦每值春夏之時穠綠交錯一望無際亦極幽雅公退之餘登高一眺清光撲人眉宇南顧黃河之奔放慨然想見古之豪杰易云王者設險以守其國不信然乎

本該員建署碑

知縣陳所蘊山西蒲城進士乾隆五十二年任政令簡明勸農課士識拔真才救荒減徭分二十六社差地等則定牌車牌馬輪流支差以除里胥臨時派擾之弊民間稱便

以上錄駱文光名宦題名碑

案駱文光壁記於陳所蘊官績下直錄維查邑志自康熙年間王賜魁定里甲之差案地分別官戶於戶各自急公不相爲累至陳所蘊又能

因時變遷皆屬至公不易之善法今奉行年久章程暫廢難得平均急應設法整理庶前人美政不至病民有司牧之責者其加意焉以上由壁記是觀之足知陳所蘊政令之善而賂文光既以是白許又以許人尤善之善者也

知縣蔣萬寧江蘇吳縣進士嘉慶七年任練達明敏事至立決務期以善化民不爲鷹擊之治民皆愛而畏之至其判斷疑獄不假刑訊更屬常吏莫及時有李烈婦以拒奸被害詳本志烈婦略李廷以耙釘身死有翻蔣把世說傳世兩大疑案茫無

端倪均能親身暗訪得其的實或置大辟或請旌表萬民稱快咸以青天呼之八年河決衡家樓水勢滔天直趨封城破堤而入南門塌陷岌岌可危幸其督率堵塞水繞城西而去始得化險爲夷蔣卽請振減徭加意撫卹以蘇

災黎又力請上憲脩城浚池築堤以防不虞

北堤埧口東邊
納存蔣公堤碑

在任數年設立

義學培養人材倉廩盈溢盜賊屏息後調任孟縣民多思之

本略文光名宦
題名碑記暨探

訪

知縣馬際泰浙江會稽舉人嘉慶二十三年任性仁厚持廉介民有爭訟惟和

解之政簡刑清論文課士諄諄講學與寒素無異在任三年民愛之如父母

其子步蟾後入詞垣人謂厚德之報云

本略文
光壁記

知縣郭景儒山西陽曲廩貢道光二十六年任性曠達政廉平愍聽斷案無

留牘時置奇荒民多饑溺乃加意賑務請款勸募以求實惠及民絕無絲毫

染指封邱西南大堤北邊屢年積水爲患甚巨乃勸民疏通渠道使水有所

宣洩一方始得安居至今猶依賴之後以憂去

本略文
光壁記

知縣駱文光字子木直隸青苑監生原籍浙江會稽咸豐十一年二月任時捻匪倡亂獲嘉李占標等乘機竊發封城雉堞圯毀隍土坍塌如不修築實難捍禦適上憲頗札勸捐軍需及防河經費文光乃權量重輕稟明撫憲將捐項暫緩提解約商紳民衆銳志成城五月動工越四閱月而告竣卽急編練鄉團教以陣法秣馬厲兵以防非常至十二月初東匪郭秉鈞焦欄倡等卽西來以城堅守固掠而東去封民未受大創者皆文光謀劃之力也亂甫定卽復創修書院建立考棚延師招生殷勤造士河北驛站正路向由祥直接延並不繞道封邱自咸豐三年後渡口環頭擅將渡口移至陳橋祥延官紳遂以道遠爲藉口妄行扳累文光乃據情屢稟上憲文詞不抗不卑委曲婉轉百方經營始將驛站仍歸祥延正站永釋封邱無窮之累封邱前令向無

題名碑記文光又將前清以來令尹姓字一一勒諸貞珉某也廉某也貪某也直某也曲黑白劃然昭若列星非惟使後之官斯土者惕然知所法戒并令後之脩志者有所依據而施其月且其用意之周託志之遠大率類是司謂良吏矣今雖人亡風微而甘棠猶在視其大堂暖閣木刻一聯云莫行半點虧心事不受一文枉法錢額書頭上有天不僅筆法精工其爲人亦可想見令人低回留之不能去云

知縣孫成竹陝西南鄭監生同治四年五月自潯縣調封是時捻匪鴟張竄踞鄰境乃於催科撫字之餘編團練設探訪秣馬厲兵保衛疆圉迨七年三月捻匪竄擾卽率兵民登城嚴守賊知有備繞堤東走全城得以無虞

本稿

知縣張寶森山東武定蒲台副榜同治十三年六月任家本富有心切民社任

中費用不給恆取給於家且疾惡若仇土豪劣紳一毫不少假借屢經調

遣俟以憂去至今民猶思之

本檔
卷

知縣宋夢蛟光緒元年十二月任注重農業修理倉儲整理書院考棚不數月

而善政班班至二年七月卸民咸思之

本檔
卷

訓導方智軫陳州淮甯副貢光緒十四年任宣講聖諭以化愚民勤視義學以

促文化訓士之道嘗勉以業務勤修至誠方爲實學心存直諫遷善方爲指

歸是以士論翕然莫不欽佩又倡修文昌閣暨周圍墻垣後以訓迪有方題

陞士紳挽留不聽其去上憲令准暫署以洽輿情云

本檔
卷

知縣左輔長沙人光緒二十一年五月任廉明有斷凡聽訟必使兩造各盡其

詞然後斷以己意悉中肯綮有仲氏片言折獄之致又封邱糧銀釐加戶捐

積弊已久乃悉革無遺在任一年民晉匾額堂壁幾無餘地

本探訪

知縣陳煥愷山西舉人光緒二十二年六月任陳初試仕下車卽以循吏自許見紳民爲左前任所獻諸匾額乃慨然曰彼曲曲者何足道我爲政必逾乎此由是持節廉介斷獄勤明興利除弊去之日紳民遮道挽留途爲之塞

本橋

卷

訓導樊振家字凱臣內黃舉人光緒十七年四月任品學兼優情殷作人訓士務以盡倫植品爲先諸生中有放蕩不羈者時召誡之士風爲之整飭而文理精通儒雅可親尙進之士多受業於其門與之遊者盡屬名下士又倡捐募購買書籍以促文化並倡脩文昌閣及補葺明倫堂敬一亭有種種公益之舉

有碑文見文徵

兩次俸滿曾膺保薦後在任丁憂官紳不忍其卽去適縣高等

小學堂成立猶延爲中學教習云

本檔卷

知縣黃庭芝字瀛橋廣東文昌拔貢光緒二十五年正月任學問淵博情殷造

士生童考課試卷親筆批改又捐廉同訓導樊振家倡募買書促進文人知

識至關心民瘼則辦保甲親定章程辦實業一再勸諭常借課士策題訪問

民間疾苦爲圖治資以之利興害除者屈指難計封邱糧銀雖經左任革去

厘捐戶加而吏胥猶以並戶捐厘成分浸牟萬民黃廉得其情悉爲革去

碑有

現存第一小學

光緒回鑾道經封城竭力辦差以事關非常虧累頗巨人爲之危及

晉謁皇太后反以忠厚長者相許將虧欠悉爲蠲去及科考停學校設封邱

又賴其力創辦高等小學堂以爲異日文化進化之基礎

有開辦學堂及呈文見掌故

調鹿邑去

本檔卷

知縣姜麟書字伯亮江蘇常州陽湖舉人光緒三十二年四月任政治簡明民沾實惠有詩才對於教育更屬關切如改良私塾廣設小學皆炳炳烺烺不宜聽其掩沒也

訓導張樹勳汝州郟縣人優貢光緒二十三年十一月任講求正學爲士矜式

採訪節孝不遺餘力

本檔卷

主簿曹祜孫順天武清監生宣統二年三月任對於應管事務克盡厥職河道趨向土性沙鬆素極講求又不時親歷查勘遇有愚民作踐堤堰等事再三勸而不改方以刑罰懲之事關訴訟毫不准理彈壓地方保護閭閻辦巡警暨保甲不憚勤勞每夜必親查數次大小客店均立循環簿冊詳爲查視究未嘗妄罰一人與百姓如家人父子且於新政急力提倡鄉董每開會議必

詳爲宣講立憲國民之利益以通風氣是以署任期滿紳民恐其卽去曾稟

請知縣轉詳借寇云

本稿卷

知縣文械字筱峯正白旗人筆帖式宣統二年十二月任清廉愛物民多懷之

置國體變更凡百新政奉行甚力縣署陋規悉予罷除民國元年去

本稿卷

民國

知事注之炎字靜涵信陽清拔貢民國元年七月任成名之初杖策從戎運謀

剿匪以功歷升知縣軍事知識隻眼獨具甫蒞封初辦清鄉繼改守望均有

條理且勇敢除暴聞匪搶劫無不策馬當先率勇往剿本境巨匪寇會先于

雙對王水鷄丹金魁等廩延巨匪常太之張喚焦二金五等長垣巨匪王鳳

鳴王鳳山靳玉漳張馬五王貴妮李長貴等悉被挈獲嚴正典刑盜賊斂跡

民得安居卽改車馬隨糧征收定漕米自封投櫃社書土劣舞弊中飽之陋習一揮淨盡且革門丁用收發慎詞訟興教育利興害除庶政維新封民感

德及今猶思慕不忘云

本櫺卷

知縣姚禮坤廣東番禺監生民國五年一月任性豪邁貌英武屢宰大邑經驗宏富及蒞封嚴明聽政強抑弱扶奸役土劣當面斥逐上憲加考以聽斷勤

明兼長緝捕興利除弊循吏風規相許

本櫺卷

知縣王澤溥字訪陸安徽潛山縣宣統己酉科拔貢法政畢業由合肥審判廳長遷河南獲嘉縣知事民國六年二月署封邱是年八月縣屬李七寨南河流直逼大堤水勢浩瀚幾至決口澤溥親往查勘飛章呈報幸上憲調撥沿河八局官船數百艘運石填塞復培堤根慘淡經營始能河慶安瀾化險爲

夷又將雲騰等區河流灘塌糧差呈請緩征以救災黎次年五月淫雨經旬積潦丈餘直奔縣城南門奪關而入風雨交加濤聲如雷昏夜之際驚爲河決奔竄無地澤溥督同役民親往堵塞乃愈堵愈漲民夫盡行逃散無奈又調撥隊勇邀約紳董極力堵禦目不交睫者累夜卒竟厥功城池無虞澤溥又精律例善折獄凡訟者投狀必先引見若係鵝鴨之爭則諄諄勸導令歸安業如遇重大之案則立即傳訊當庭判決曲直分明民無冤獄在任兩載摒擋公案五百餘件其法理精奧洵爲當代能吏並善書法所撰屏聯人多

寶之

本檔卷
及採訪

知事修雲翰直隸平康縣清優附生法專畢業民國九年一月代理甫下車興學校禁烟賭防盜賊抑滑吏是以視事未久循聲洋溢尤足紀者沙河灘地

本屬農民舊業官產處失察誤認變賣與民爭質上憲飭縣查復履王曾兩前任猶屬懸案雲翰接篆之後立即單騎減從沿途八十餘村調查精確詳細呈覆得蒙上憲核准該地仍屬民有黎庶以修來福相稱非溢譽也且對於訴訟則每日親收詞呈遂遞遂傳遂訊遂銷案無積牘民無怨懟

本櫛卷

知縣鞏思溫號霽棠河南臨潁縣清廩生民國十年法政畢業自孟調封時當伏莽齊起民無寧日思溫督率巡緝隊長王捷堂偵騎四出獲渠魁數名盡置之法宵小聞風遠颺地方賴以安謐封邱縣城年久失修雉堞圯毀難資捍衛乃勸令紳商捐資修築工程甫竣直奉戰起宏威軍總司令趙傑密調第一營營長趙步衢督率新收桿匪武林大金寶等一千餘人駐縣詎以武部爲匪性成騷擾勒索秩序紊亂思溫挺身隨機酌應巨亂方息無何武部

奉調赴鄭作戰全軍敗竄仍奔河北道經封城入欲劫掠思溫又親往招待令其駐紮西關不允進城夜闌督率黎庶登陴防守潰兵知其有備全軍北逸而去是年十月丁外艱辭職回籍閭邑民衆因其潔己奉公不忍遽舍赴轅懇請回任上憲廉得其實於十二年四月奪情令重蒞封至則濟渠道以

興水利裕田賦以恤民瘼以本年九月復卸去

本橋卷及採訪

知事卓立字超如陝西臨潼縣人法專畢業曾充陝西靖國軍指揮部軍法官國民第二軍總司令部軍法處處長民國十四年三月奉督辦胡委任封邱縣知事下車後慎思明辨循謹愛民潔身自好士庶歸心是年夏有營混郭某自號團長招納亡命綠林千餘衆盤踞留光鎮向縣勒索給養并窺伺縣城立密電胡督派撥旅長胡景銓率兵三營來封剿捕誘匪出寨槍斃元兇

餘賊潰圍遠颺追殺無算生擒數十民得以寧次歲春第二軍在蘭封與寇英傑部作戰敗績渡河潰兵數千索款甚奢勢將譁變幸立爲其舊日長官職操軍法未敢妄動第當時地方公款早如懸磬無從措辦立慨出廉俸千元隨時兌付次日潰兵攜款西歸全縣賴以無恙縣西南西斗社有被灘塌請免丁漕未經呈准經立向民財兩廳面陳百姓苦况情辭迫切公牘數上

方准蠲緩云

本檔卷

縣長畢升垣字紫光吉林長春人日本法大畢業民國十五年五月任時巨匪吳秀山等聚衆吳寨夜出劫人聲言將襲封城萬民逃避十室九空升垣探訪底細乃約武警集民團以團長黃夢瀛率衆四百餘進剿已領八百餘衆冒雨涉水爲之接應自陳橋緣堤而前至馬房條與賊遇南有賊船兩艘人

約五百往北飛渡堤北有葦坑數畝賊多伏其中堤頂及堤坡賊人預占形勝三面對我軍齊攻我軍盡係新集鄉農素無訓練戰器又多不利幾爲賊窘幸管帶能鎮之以靜令將所帶守城土炮對賊連射船賊飛逃而堤邊葦中之賊見勢孤亦逸去我軍乘勢努力追逐斬吳秀山等三人生擒賊數十名回縣升垣將死者梟首生者嚴辦又將該匪所供諸村醜類屢往剿拿餘

賊遠颺萬民以甯

本稿卷

封邱縣續志卷十五

人物略

略二

鄉宦

人物略一

清

王民字熙臯號靜修大岸王九我子六歲失怙祖賡和撫之刻勵讀書夜以繼日以乃祖卸世家務紛繁未得成其大志雍正元年援例入成均考授直隸州同知以河員用庚戌署山東濟甯州上河水利事例無養廉前官資於夫食之羨與一切器具之餘民至悉以歸公一毫莫取其闢背多修蓋鋪戶及往來寄居者或請驅逐以便啟閉民曰向來無礙公事曷爲借端滋擾耶遂罷其請運河同知某君嘗委運糧銀交兌藩庫於額數外發添打銀五十兩

民兌足額數卽以其餘交還後署東昌水利其盡職一如在濟當督守荆河
口時厥山險峻夙夜奔走護視雖疾風暴雨不少懈或以爲勞民曰吾分也
豈敢愛身以遺數千百人漂沒憂乎時對岸挑引河民承挑八十餘丈自券
夫役重勞百姓視他人費減十分之二四而工先告竣以故諸上憲知民勤
幹方思薦之朝廷俾得大用而竟告老回籍民性至孝每以不克奉父爲恨
歲祭祀輒嗚咽不能作聲且好施予稱貸不償者率焚券婚嫁喪葬爲難者
輒周濟子夢叶官湖北潛江縣扶民之存戒之曰清慎勤官箴之要當時時

服膺此語

本桐城進士張
若本撰傳

王揆字揆一號愨齋雍正十年孝廉乾隆十八年奉部捷取赴都門時安徽請
揀發人員挑中發往試用抵安慶撫委放振宿州各員分派地方月振一次

屆日領振不到卽扣除僕隸特索攔阻以圖分肥揆察其弊使隨到隨領設不到下次准補賑完委署霍縣旋卸二十年水淹數十州縣撫委查勘鳳陽

泗州水災至天長藩委查放該縣振務揆分極貧次貧兩種極貧先加撫恤

較次貧多一賑不使一夫失所賑完委署潁州府糧捕通判丙子爲鄉試同

考官上憲以揆外朴實而內精明委署池州府江防同知帶印督理鳳陽懷

遠兩縣賑務其查放之善仍如天長又委署全椒縣旣而實受黜縣事較繁

多信風水爭墳山揆盡爲之斷結有婺源縣查余二姓爭墳地傷人命審斷

未明查姓上控上憲委揆勘問乃按地畝魚鱗册丈量的係查姓墳爲余姓

強占葬棺據實以詳竟爲後官盡翻前案揆看時勢不利因告職

本下氏家譜

郭廷翊字醒園坡而里人嘉慶癸酉領鄉薦學問淵博制行廉謹道光七年官

鄆陵縣教諭甫下車卽倡諸生脩忠義祠數月廟貌一新又體俸增製學宮

禮器曾畧開封府教授事鄆陵縣志列有宦績

本採訪及
鄆陵志

邊其晉字楚材號退齋青莖長子道光壬辰科副榜選授登封教諭因河工出力薦保廣東英德縣知縣丁未二月赴任英德民俗强悍素稱難治聞謝司馬眷船至白石濬被劫卽時親率船勇開砲拒之斃數十人而賊砲中營船藥櫃火轟船壞又督別船進攻擊沉賊船一隻獲匪首歐陽崩鷄三十餘人溺水死者不計其數全股悉平己酉春英人分道侵粵人心惶惶晉奉委襄辦洋務七月祖母棄養聞之哀毀異常繼因洋務平靖制憲擬保升留粵補用不肯署名交代清結星夜旋里急營窀穸哀禮兼盡癸亥春入都投供四月選授廣西藤縣知縣抵任見衙署廟宇無一存者居民尤屬寥寥四鄉多

爲賊所盤踞誓以恢復地方爲己任於是訪民生之休戚詢地方之利弊覽山川之形勢審進退之機宜散脅從之羽翼壯軍容之聲威募勇丁集團練剴切示諭真心投誠者恕之予以自新負固不悛者剿之殺之無赦每戰必身先士卒親冒矢石軍士皆奮不顧身爭先陷陣救出難民男女數千餘人又約束練勇秋毫無犯是以先聲奪人戰無不克獨三吉大岸剩表三賊寨尤爲堅險前任知縣宋陳兩明府皆遇害官軍攻之三年不克晉迺激勵將士勉以忠義親督進攻三寨悉平蒙上憲專摺保奏奉旨賞戴花翎加四品銜外寇肅清尤極力整頓內治興利除弊起廢補亡縣志燬於兵燹片板無存迺博爲採訪親加考訂期年刊竣又將縣署捕衙文廟武廟書院義學次第重修復籌款延請山長主講樹人經古兩書院培植人材文風大振嗣因

積勞成疾力辭瓜代去之日父老遮道攀轅依依不舍晉亦潸然泣下及抵里仔肩頓謝體健漸復一時名儒碩彥博古通今之士多執贄門下樂受裁成以故登虎榜膺鸚薦者指不勝屈著有陔蘭課藝蔗林試帖蓮心香餘詩鈔家規學規要言靖海秘計兵政心籌等書光緒十一年壽七十有六卒

本邊

氏家
乘纂

姜承惠字陰甫號荷軒封邱留宜社姜莊村人咸豐戊午科以優貢中本省鄉試爲人質直尙氣節咸豐初李文清公主講河朔書院承惠從之遊爲文有豪氣文清公器重之因得見知於毛文達公昶熙十一年辛酉河南捻匪趨鞏洛秦晉皆驚毛以府丞總河南團練延入幕文達公勦捻有功一切規劃姜尤爲出力蒙防河大臣保奏奉旨以知縣分發補用同治四年乙丑會試

後在部呈請掣籤原籤廣東以親老告近改掣陝西九月引見奉旨領照發往陝西五年正月到省四月奉藩司林委專管涇州糧台分局支發銀錢事姜潔已奉公辦理得宜六年臘月以功委署延安府延川縣知縣時值回逆滋亂甫退隴境大兵西勦絡繹不絕差徭繁浩民不聊生姜以肆應才寓慈祥心周旋將士結歡勇丁是以閭閻幾不知有兵車之苦翌年春初賊復竄境逼近城垣姜復率衆登陴日夜輪巡未嘗稍懈城得無恙又兵燹之餘潰勇肆擾更爲設法驅逐潛消禍患民又賴以安堵朝廷以守城功加同知銜縣民戴德額曰恩同再造八年六月以親老告養憂勞之餘因得目疾光緒

二年卒於家時年四十有九

本來稿纂

吳蔭恩字效先號榮卿先世爲滑籍至高祖乃謙始遷封邱之山莊遂爲封邱

人父殿元母張氏生蔭恩一人幼卽英異絕倫讀書善記而無忘弱冠補祥
邑博士弟子旋食餼陰恩素志高尚不屑小就乃肄業大梁書院試輒冠其
曹尋丁外艱家居讀禮事母以孝聞旣服闋仍入汴肄業冀獲一雋以光門
閭迺以數奇屢舉不第至光緒丁亥以恩貢選雒陽訓導雒爲古名勝地亦
四方文人薈萃所司鐸非得名賢不足以鎮之蔭恩之任適與本邑孝廉何
家琪同司教職日坐皋比於諸生講習討論薰陶鼓舞面命耳提循循善誘
凡所以養育人材造就後學者靡所不至甫二載東京文化煥然復起英才
輩出一時之士擢巍科登顯仕者指不勝屈至若翰院之林東郊孝廉之白
長庚袁宣師輩則尤其門下受業之士在雒九年夙夜匪懈克盡厥職至光
緒乙未復以辦賑出力加六品銜保薦知縣歸部銓選逢特恩授承德郎次

年春卒於官次

本黃蔭桐
爲譚傳纂

邊祖恭字子允號安卿退齋三子幼承家學勵志讀書弱冠遊泮每試輒冠其

儔同治壬戌恩科登公車計偕入春闈屢試報罷庚午以郎中供職農曹甲

午改知州光緒甲申選授雲南安寧州以親老告近除順天霸州七月丁外

艱服闋報供己丑除陝西葭州之任值歲饑人心浮動緩榆游匪尤從而煽

惑之飢民嘯聚其勢岌岌迺懲首惡解脅從積穀賑貧全活無算地方賴以

安謐癸巳夏調署隴州隴爲陝右門戶防範稍疏則覬覦易生祖恭又爲之

築堡塞繕城郭倡團練凡險要所在備無不周更值大軍過境回民惶惶欲

爲變賴祖恭明以喻之信以格之羣疑既釋始得轉危爲安上憲廉知其幹

濟保舉花翎運同銜丁酉六月委辦潼關釐金八月調署華州華爲五省通

衢差徭繁劇素稱難治兼以刀匪出沒據爲淵藪殺人越貨無日無之祖恭乃捕首匪置諸法而民自安堵州西過仙橋孔道也河淤橋圯行旅爲苦復修而葺之疏而通之其患遂除以卓異保荐加三品銜奉旨候陞庚子恭逢覃恩誥授中議大夫嗣因時局不靖喟然歎曰宦海茫茫而如彼世局滔滔而若此急流勇退此其時也遂絕意仕進在地方提倡諸公益修城池組商會增築護城堤皆首先稟請領導紳董竭力籌辦以固一方之保障民國十

一年九月卒壽八十有一

本邊氏
家乘

謝埤字崇雨陳道人性勇敢慷慨有大略宣統辛亥受密令辦河南革命事與諸同人伏身汴垣師範學校以圖進取後爲清有司所知派隊圍勦謝潛跡河北方得不死及清社屋屢任政財軍界各要職壬戌之秋知西華縣事適

值魯匪破城之後餘氛猶熾全縣騷然亂將復起謝措之裕如寬猛兼施未至數月政新民歸旋被調省次年春復任知修武縣事行至鄭州以暴病歿

於旅舍年僅三十有八

本范允文爲
建紀念碑墓

杜扶東安上集人幼而岐嶷舉動異常凝重七八歲隨父醒吾在修武縣署讀書命習千家詩帖括賦均不喜見縣官用刑訊心甚不平十三歲復隨至鹿邑初學英文看上海時務報見揚州十日記嘉定屠城記心尤憤慨遂有推翻滿清之志又見政府腐敗朝野士夫安守故常不知改革外國科學發達一日千里將來必至相形見絀此時欲培植人才啟發民智非開辦學校不爲功杜之富有革命思想自此始矣年十五考入河南大學堂榜名振亞字扶東卽積極宣傳革命聯合同志曾可樓程仲漁王北方劉熙亭諸君在校

一年演說革命被開除遂北走天津改名潛入北洋大學仍鼓吹革命得同學孫文明天姿英邁以爲日後可担負革命重任者必此人也斯時在日本河南留學生來函願贖資邀其赴日留學杜雅重孫遂舉孫以自代改名鐘入口航海學校是秋杜以官費赴日習法政值孫中山黃克強兩先生在東京組織同盟會杜與曾程同參加旋與湖南宋教仁滄州張溥泉廣東胡漢民汪兆銘及河南曾程等組民報社在東京出版提倡民族主義宣傳革命鎮南關黃花岡諸役均參加計劃汪之炸攝政王載灃也杜亦與謀汪時任同盟會評議部長回國執行職務公推杜承其乏英商福公司光緒二十一年在豫北焦作開鑛採煤豫當局劃黃河以北懷慶左右諸山爲鑛區留日同學認爲喪權辱國卽推杜及王印川回豫爭鑛孫中山命杜兼組豫同盟

會河南支部卽以爲支部長到汴介紹新蔡劉粹軒閻子固鞏縣劉雪亞汲縣趙伯階入黨成立支部此爲河南革命之始是年復返東京適商啟予至自奉天傾吐胸懷相見恨晚遂介入會並請商回豫密結同志待機發動清末葉留東同學因取締風潮多主張回國胡經武尤力嗣經杜多方譬解胡氏遂深爲贊同胡回湖北謀起事又舉程仲漁助之未幾同志劉家運被捕訊供胡亦受逮程復東渡泊宣統三年各省同志回各省圖大舉杜在東京法政畢業亦乘輪而返益見政府措置失當時機已至遂以密計授張鍾端劉粹軒等在汴組設機關復聯合山東丁惟汾在濟秘密進行斯時二劉與愆玉琨張治功王天縱等密爲聯絡以備隨時響應張鍾端在開封事敗被清軍所殺是年冬杜至濟南運動巡撫孫寶琦獨立孫畏罪復取銷杜不得

已赴滬會同陳其美克復上海遂組滬軍先鋒隊與粵浙兩軍會攻江寧公推黃克強爲大元帥黎元洪副之電請孫總理由美回國民元正月三日成立臨時政府杜奉總理手諭爲臨時秘書長旋奉命爲山東都督率滬軍八營粵軍一師海容海籌楚有三艦兼程前往首克煙台繼下登黃一帶山東巡防統領葉常勝抗禦一戰敗之遂進軍龍口清廷大震內閣大臣袁世凱奏請清帝下詔共和復委唐紹儀爲全權代表二月十二日清帝退位杜此時被河南諮議局選爲臨時參議院議員遂辭山東都督來京供職甫到京袁卽派趙秉鈞陸建章二人爲招待陸時任執法總長一見傾心深相結納同志有被陷害經杜保全甚多二次革命在上海南京活動均失敗派朱丹陸在豫皖組淮上軍又爲張鎮芳所殺民三陸督理陝西軍務邀杜任軍法

課課長民五隨陸回京黎元洪爲總統恢復國會仍充議員張勳復辟徐樹錚倪嗣冲密召各省督軍代表在蚌埠響應事爲陸所聞卽召集陳光遠李達元馮玉祥會議討伐陸恐勢孤請杜密往江西商請督軍李純援助未幾復辟軍敗潰民七段祺瑞屢令十六旅援湘杜乃與陸馮密議久留浦口不如以援湘爲名出其不意佔據安慶師遂西上至武穴屯軍不發又往滬籌款與譚組菴岑春煊接洽以五萬元犒軍并約山西景梅九安徽常恆芳相助獨立通電出北軍以四師之衆壓迫武穴而內部不一致陸北旋天津遂爲徐樹錚暗殺杜赴廣東護法參加非常國會陳炯明叛國會遷蜀遂北歸民十三回豫調停胡憨之戰民十六黨軍北伐進佔駐馬店馮玉祥師出潼關次洛陽時張學良駐鄭州杜以別動隊夜襲張司令部張與韓麟春寅夜

北退東西兩綫十餘萬奉軍悉潰敗馮遂與唐生智劉興張發奎會師於鄭而汴亦下馮命爲獨立第一師師長杜固辭以其衆交王海門一人第八方面軍劉雪亞幕參加戎機凡疑難大計惟杜言是從是年冬劉君被困考城孤守兩月杜出奇計突出重圍未幾渡河襲取長濮大等縣北抵京津杜奉命駐鞏頭鞏固河防兼領河務局民十九馮同閻錫山與蔣介石政見不合中原不幸重罹兵劫張伯英以中原大計說蔣蔣動容當時杜在平津秘密工作盡以北方虛實告張蔣所以屢敗不退者蓋以盡知閻馮内幕也軍事定張任河南民政廳長二十路總指揮及振務會主席杜被邀代主振務時豫值兵燹之後地方極待拯救杜籌募救濟不遺餘力二十年復被水災受害七十餘縣洛伊沙潁淮等河流同時潰決經百方呼籲乞振中央政府

遂撥振糧二百餘噸分配洛伊沙穎淮諸河及各縣災區派楊子功駐鄭主辦其事國振會又撥振款十餘萬滙慈善團體立募鉅款派員來豫散放至今民被其澤又在汴鄭成立災童教養院豫南災童收養所是年夏秋之交潼關以東發生虎疫又設全省防疫處二十三年黃河決口又設立黃災婦孺救濟會數年間籌募振款三百餘萬全活災黎無算現任焦作中福公司

董事

本柘城曾傑謙
爲撰事略纂

張鳴珂字曉鸞油房人幼穎異博學能文十八入邑庠翌年取高等食饋二十
一學使舉優行共和二年京師國立法政專門學校畢業歷任河南高等檢
察廳檢察官開封洛陽等處地方檢察廳檢察官河南吏治調查所調查員
所至均能實事求是無忝厥職嗣以辦理地方振務督勸辦修築銅瓦廂堤

工卓著勤勞蒙大吏保以縣知事分發直隸仍留豫省任用并獎以七等嘉禾章鳴珂孝友成性又復慷慨好義凡桑梓災棧無不竭力拯救而必先自捐輸以爲之倡當任洛陽檢察官時接母病快函立即請假旋里抵里睹母病狀決意辭職書再三上方准而母竟病數月而逝從此絕意仕進閉戶讀書民國九年鄉人以鳴珂慈祥公正公選爲第三屆省議會議員於地方興利除弊防患振災諸事無不據理力爭讜言正議羣相佩服十一年五月馮趙鄭州之役潰兵繞黃河橋順流而下至陳留口登岸屯聚貫台數日附近數十村擾掠不堪鳴珂長兄季弟均被擄勒贖家亦被搶蕩然一空鳴珂痛心手足四出籌貲道途奔波告貸艱苦生平困境無逾於是者幸兄弟先後贖回鳴珂之心大慰每遇旱荒水患鳴珂請政府救濟外遠近災民過境者

無不備般設粥力爲拯救就食就居門庭如市家人好善習以爲常從未稍形厭煩古所謂鍾離子代王養民無以過也二十四年河決店集口災苦甚於往昔籌振更難數倍鳴珂睹此鉅劫寢饋難安商請縣長先借倉穀施放尅日成立合作社貸國幣七萬元悉心措置子遺賴以不死鳴珂之力也封邱地濱大河決口屢屢成災鳴珂遇災卽籌振是以全活無算鄉人感戴每欲建石頌德鳴珂堅辭不受衆尤高之邑志修自清康熙初迄今歷二百餘載未經續脩鳴珂恐文獻失考正擬提倡續脩適大府檄促乃成立縣志館公推鳴珂爲館長卽籌款延聘通儒開館纂脩中因兵事兩次停頓終賴毅力卒底於成二十五年因積勞病故邑人惜焉子二世驥河南大學畢業任本校助教世驥中正中學肄業

本許鈞爲
課半略纂

石如璧東孟莊廩貢清康熙三十九年以博學任彰德府臨彰縣訓導課士殷勤立身清正士民德之於其以病去官之日哭送數里臨人至今談之猶景

仰不忘云

補遺○見臨彰縣志

孝友

人物略二

清

袁芬字芳洲號復庵廩膳生幼失怙恃事繼母以孝聞冠後與母異室而居遇迅雷烈風急雨必奔母室侍之雷雨止詢母曰得毋驚長年乎母曰否色始定及母卒哀毀之狀不異所生每當晨夜輒悲不忘儒幕終身如一日弱冠入廩以數奇屢薦不雋五旬餘始食餼遂絕意進取設館授徒殷殷教誨爲學博覽經史究聖賢之精蘊考古今之得失陰陽之道性命之旨以及律呂

奧窈字學之淵源靡不究極而無遺嘗曰聖賢只一道古今無異理惟格致
功深始能識此又曰爲學貴步步踏着實地故其存心以古人爲準的以體
驗爲功夫一時從遊濟濟多士載酒問奇戶限爲穿更精詩文每一藝成士
林輒傳誦之年屆古稀猶耳聰目明不異少壯一日集諸子囑後事端坐而
逝門人哀慕私以仁孝諡之集其所著格言名曰仁孝語錄彙其所著詩文
顏曰寶硯齋集其所手訂又有考古擇善編構窗瑣錄並傳於世

本斐氏家譜

高大知字哲生沙崗增生敏而好學經傳子史無所不讀字崇歐虞褚薛文宗
下唐歸胡遊泮後丁內艱以數奇祇食餼未掄魁繼母陳教家嚴肅高晨夕
奉事益加謹飭常有不順乎親不可爲子之意旣而母爲所感向家人曰吾
子真純孝也宗族鄉黨亦無間言後因同居不便與胞弟大申大本析爨將

祖宗所遺田產讓多受寡茅屋僅可容身磽田差堪餬口以妻子歸時所折
妝奩錢買田數十畝勤儉撙節積少成多漸以殷實然富而好施濟厄周急
不可枚舉遇冬則舍衣食于鰥寡孤獨尤至意焉歲歉則出米出粟隣里親

族均霑其惠

本高氏
家譜纂

趙大奎字星吾乾隆二十七年戊子科武舉事父母以孝聞每侍側進食飲視
啖之多寡爲喜懼及歿哀慟動鄰里嘉慶四年邑被水災奎子全義捐穀千

二百石助賑

本通
志纂

邊永平字常太以農爲業弱冠失怙未學問而天性篤摯事孀母凡飲食起居
定省溫清之節雖嫻於禮者弗之過道光二年母臥病親侍湯藥未嘗暫離
及病重母日一飯亦一飯母日不食亦不食久不愈乃夜禱於神祈以身代

母果愈又七年母以老壽終享年九十有二然猶晝夜啜泣痛不欲生人勸以母死未殯不宜滅性始節哀進食嗣是設靈位出必告入必面食必獻一一如母存時齊衰五年猶不除服人或問之曰吾少失怙不知人事以爲猶有母存也今母亡吾無歸矣語畢淚涔涔如雨其族紳青藜曾爲立孝子傳

載於族譜

見邊氏家乘

范興詩咸豐時青堆貧家子也奉親以孝聞爲母病終身不茹葷酒且習爲醫

活人無算卹貧周急望重閭里

見探訪

班重縣東王村人也幼有至性父歿時尙少家貧恃舌耕力作以養母膳必視寢必問下氣柔聲終日無疾言遽色病則湯藥必嘗而後進執爨供食滌溺諸瑣事皆躬親之母歿哀毀骨立爲孺子泣勺水不入口者數日葬後廬墓

以守三年不除服不薙髮面垢不洗衣垢不濯繼縷若乞丐然咸豐十一年
髮捻北來大江南北諸行省強半爲其所據清京營及各省行營拒敵之兵
往來恆絡繹不絕時有某營自北而南經過封遊騎見班髮蓬蓬四垂疑爲
髮匪擁之去及官長詢之迺孝子也慰而遣之

見採訪

葛芳字香遠寺上人性孝友甫受書卽嗜學如不及古道自處不謀榮利座右

常置名賢格言以自勉終其身於昆弟親族中無間言壽七十卒

本該氏家乘

張武功黃陵集候選巡檢性忠厚且孝友仁慈喜讀書設塾延師培養人才無

倦意年八十有三妻八十有五壽徵齊眉五世同居孫星燦廩生星潤歲貢

吏部掣簽本省候補縣丞入民國曾充開封教育局委員著有詩文集曾孫

景鷺文生本省巡撫裕寬爲之題旌頒發絹銀等賜並獎七業衍慶匾額云

本探
訪

任樹恩字東屏邑東黃陵集人父松灣庠生早卒世父敬亭撫之成立愛之如

子樹恩亦事之如父敬亭邑廩貢生學有根柢爲時名下士樹恩從之讀故

其爲學不役役於章句之末以三德六行爲準的以躬行實踐爲歸宿胞兄

弟三人堂兄弟十有一人二弟棠恩字芾村每試輒取前茅卒未博一衿後

以納粟入成均尋逝三弟桂恩字月亭邑庠生今已七十有九皤然一白髮

翁也四弟錫恩字寵璋敬亭長男也有異稟少知名才高學博有邁往不屑

之韻然未免文舉鋒芒太露卒以落魄不遇狂於酒而齎志以歿可惜也任

家食指五十餘計終歲所入復以舌舐所得補之仍不敷用故衣食常不裕

如然任氏昆仲衣必同筭食必同案推棗讓梨塊篋和奏相對怡怡大有萬

石君家遺風焉任一生功名坎珂年逾古稀始與其胞侄景運同入開封邑庠一則龐肩皓首一則羣屐翩翩一時同人傳爲佳話鄉人羨其品格之高

家風之古共以孝友遺型扁額表其閭門云

本黃蔭枏爲
課事略纂

時順字巽齋一號正之歲貢生性仁厚好讀書嘗佐父耘田暇卽披吟古人帶經而鋤此之謂與年二十二採芹二十六食餼家無厚資全賴舌耕而教訓生徒循循善誘四方學者爭師之其弟子身列膠庠者指不勝屈豈知命途多舛利闈屢荐未獲一雋同治七年流寇逼近城郭因守城有功蒙恩獎六品頂戴其父棟生性剛直慷慨樂施拯難濟急恆解囊助之不惜更有人所難能者有安徽潁川坡駱駝醫姓尹名國全攜子成行醫於此不幸國全病故其子幼小又舉目無親惟有號泣慟哭而已棟生憐之代買棺木假地以

葬又自備資斧送其子旋里此道光二十年庚子春三月事也是時棟生年三十六歲尙無子嗣次年正月子順生或疑爲尹國全後身報其德也一唱百和吾謂不然易云作善降祥理固然耳棟生年老得一癱瘓疾順事奉衣不解帶湯藥親嘗雖履年餘如一日焉其父被褥污辱親爲滌濯家人請代不許也嗣後棟生夫婦相繼去世順於喪葬大事惟古禮是遵酒不飲葷不茹樂不斷者蓋五六年之久四鄉之中莫不稱爲仁人孝子焉且事其師王化南先生猶事其父沒後心喪三年至今猶嘖嘖人口光緒丁亥明經獲選著有家範輯覽等書以訓子弟五十歲以恙終

本李崑玉
爲撰傳錄

石印川字月波邑東五里之孟莊望族也父超如監生性好施前縣令駱公會給仗義疏財扁額因伯兄均早喪乏嗣遂以印川後焉印川生而篤厚有至

性事其伯母一如事其所生鄉里以孝聞家素小康自其曾祖理歷其祖文秀暨其伯父均皆好善樂施累世種德及印川而益光大之印川幼承家訓稍長就外傅卽從拔貢黃景召遊其叔若父以己素業農本欲博一第以光門閥第印川學雖勤而質頗鈍復限於文章憎命每試雖列前茅而卒未獲一雋以納粟貢成均終焉可嘆也然其克承先志讀書之心愈摯因以前人之望己者望其子孫生子一名韞玉字潤生稍長復從黃景召先生讀試亦屢次仍落孫山之外無已因以把總就武職曾充本縣農會保安隊清鄉局保衛團巡緝隊等長暨旅部參謀稅務顧問諸職長孫名錫恩字淇甫本省法政學校畢業後復考取承審員及縣長歷任滎陽鄆陵新鄉等承審員兼理縣知事所至有聲現供職偃師次錫嘏字子純農校畢業曾充本縣建設

局局長次錫祺字壽卿訓練班畢業曾充督軍署副官及本縣保安隊隊長
現充新鄉縣警察隊長次錫珍字聘三本省師範畢業前任本邑教育局
長民國十六年創辦師範學校躬親教之生徒滿堂已畢業數班成效卓著
次錫九醫學畢業現充本縣平民醫院院長曾孫長庭訓河南專門職業學
校畢業次庭芝本縣師範畢業次庭桂本縣初中學校肄業衆贈燕山媲美
德額皆印川尊儒重道積德累仁有以遺之

本黃陸樹
爲撰傳纂

李香山孝子也住城東三十里之小李莊邑增生令選冢子生有至性純厚若
愚幼從父讀書見禮記孝經卽手不忍釋年十九完婚妻張氏亦大家女素
嫻禮節更以事親盡孝相勸勉夫婦志同道合同孝養益篤不意其父年未六十遽
爾逝世香山當父病時延醫祈禱無所不至藥必親嘗湯必親進目不交睫

衣不解帶者三月如一日及其父卒香山一痛遂絕家人警駭失措少晉薑水漸回甦衆勸以母在宜保重身體以全孝道於是始加一餐及其父大殮之後朝夕宿於柩旁每飯必供一如事生既葬廬於墓側葷腥不入口服制不去身卽嚴寒盛暑怪雨狂風不忍歸且跪禱曰兒在父母恐如是者又三年後其母得其奉養獲享大壽八十餘無病而逝香山亦如辦父大事云

訪冊
纂

黃鶴鳴字子和號九皋城內黃小街人少孤事孀母以孝聞性聰穎善記讀書能目下數行尤嗜學試輒冠其曹既采芹旋食餼諸學使欲延操玉尺行將爲入幕賓矣黃皆以北堂萱老南陔蘭缺不忍離母遠遊辭謝之設帳訓禮義學依蘇湖教士法而坐皋比絕意仕進僅於光緒戊戌以明經貢太學終

焉黃秉性豪邁逸宕不羣喜交遊好筵客有鄭當時之風迺陳榻欲下而阮
囊恆空三徑就荒二仲不來可若何爰藉元龍百尺之樓聊設司馬當爐之
酒於是舊雨新雨少長咸集月夜花朝車馬盈門或擊鉢催詩或刻燭論文
雖無低唱淺斟敲金戛玉之美而一觴一詠或歌或弔亦騷客之幽情而文
人之雅況也年六十有三卒

本來
稿纂

劉長昭字孔卿清邑庠生小魯崗劉柱子庠生松之猶子也性耿介而恭謹簡
靜寡言出言必中其事親以孝聞然其孝又有不可及者父兄弟四伯父松
居長乏子父柱行四生子三長昭其仲子也長昭晉爲伯父松嗣伯父視長
昭不啻己出長昭事伯父亦無異於生父其伯父晚年衰萎言語艱澁其所
需卒不能言惟以指畫表示之長昭窺意觀色恆投其所好而得其歡心日

夜侍側凡飲食起居皆親身任之如是者數年弟長明與之析居後而家貧長昭衣食與共如同饑然亦人所難能其孝且友有如此者

本李峴玉爲
講事略纂

汪梅字占魁邑庠生縣西北汪賈村人生有至性事父母以孝聞父祥嶺治家整飭梅幼讀書篤責維嚴書稍不熟卽呵叱隨之以故梅於六經四子稍長皆能成誦終身不忘事親能以色養平居視膳問安皆體貼入微親性雖嚴而常能得其歡心不幸祥嶺晚歲倏得癱瘓之症動作維艱時梅方在外課讀聞命卽辭館旋里左右就養百方調治卒不痊藥必先嘗食必躬進雖着衣納履結系甚至便溺滌罔諸瑣務亦親身任之不許他人代作衣垢忘濯面垢忘洗十三年如一日及祥嶺撒瑟乃痛不欲生饘粥不進者累日自大殮以至小祥盡哀盡誠節節準古禮以行之既葬後持喪三年春而怵惕秋

而悽愴雖麥飯豚蹄之進未嘗不涕淚沾裳也妻呂氏亦賢孝能博翁姑歡治家以勤持身以儉荆釵布裙舉案挽車有孟光少君之風焉長子紹先敦厚周慎有父風民國十六年秋因事赴縣歸見路旁有遺金百餘元姑拾之以待尋者後果有人來訪問係延津王堤賣油者所遺如數慨出璧還其人感激言厚報紹先笑却之次子紹祖字繩武清宣統己酉選拔民國北京法政學校畢業歷任信陽江蘇洛陽高等審判分廳書記官長

本黃蔭併為譚傳纂

民國

賈夢祥字良弼夢齡字松筠縣北街同胞伯仲也其父桐慷慨好義父子俱列成均咸豐末東匪擾封桐奉賂知縣文光命與練兵團以乃心公事目不交睫者經旬守城之時男女數羣逃至城根匪踵其後相距不過百步桐急緝

城而上繩不敷用解已腰帶繼之民衆得免於難事定駱令上功於大府以六品頂戴獎焉夢祥貌魁梧而性豪邁夢齡貌俊秀而才清逸其父桐因才施教令長習弓馬次事詩書文武競秀以求進取適光緒三年歲大饑斗米千錢人相食遂改而經商逐什一之利以贍家口有餘則施諸親友之貧乏者伯仲雖居市廛而宅心仁厚一如平日是以富厚長者多樂與之交易財用日裕而周濟貧苦亦日篤有退職號友王某病故恆周其家其仁厚待人類如此伯仲性皆鯁直不苟同流俗終身未嘗作狹邪遊事親最孝桐卒喪葬一本於禮兄弟亦甚友愛善相勸過相規疾病癢相扶持情誼篤摯有姜氏大被遺風至於義方教子更爲他人所莫及子侄輩或涉荒嬉惰正事者無不喝責立加不少姑息必至其子侄長跪請罪而後已且均能子侄同

視慈愛督責不分親疎故其家庭之間內外雍肅男女老幼秩然有序詩云

貽厥孫謀以燕翼子此之謂與夢祥三子自修警官學校畢業歷任本縣警

察所巡官及所長與商會主席閭邑紳商立碑頌德嗣充密縣經征主任省

政府傳令獎爲各縣之冠四子彥修師範及林務訓練班畢業歷任本省財

政建設兩廳科員現任國民革命軍第二十路總部庶務主任夢齡子名潛

修法政專門畢業歷任本省稅務局長財政廳收發主任省政府秘書河南

官硝磺總局科長扶溝縣長現任沁博修官礦局局長孫毓棻自修出省立

五師畢業曾任本縣師範教員毓荃潛修子高中肄業生子鶴鳴四世同堂

孫女毓華彥修出省立女子師範畢業現肄業河南大學

本來稿纂

寫之經字箱五寺上人性忠慎寡言語寓聰明于渾厚庸流恆以迂儒目之七

歲失怙母命入塾刻苦自勵童子試屢前列弱冠後以縣案元補博士弟子旋食餼繼肄業大梁書院課藝每蒙厚獎迨學制更乃灰心仕進退守田園事母至孝御弟極友尊卑親疏各適其義不僅朋友有信己也後舌耕於馬村孫灣暨長垣之干辛莊劉口等村弟子多賴成立其學不厭教不倦至今士猶稱道之常語人曰吾不願得萬貫產但願一生無愧怍惜年祇強仕卽

化去云

本該氏
家乘

范景振字興雅生而岐嶷聰穎絕倫稍長研誦詩書尤工八法篤學好問鄉里咸以紆青拖紫期之未幾其父清魁兩目昏翳龍鍾難行景振孝心純篤隨輟學廢讀對於盲父起居坐臥寸步不離稍暇則效老萊子軼事將古今瑣聞歡忭細述以怡親心數載之久未嘗懈怠迨至清魁病歿哀毀骨立痛不

欲生轉念慈母在堂梵子孀守缺乏孝恩乃節哀奉親倍加勤懇孜孜不倦其於鄰里之間接物應世無城府無宿諾鄉黨景其範型每遇訟爭得其片言無不解釋且素尙慈惠凡葭苻戚好因急告貸者必儘量資助惟恐不足並於本村創建小學培養人材其有鬻鬻兒童乏力求學則設法補助使之上達且盡心公益慷慨輸財處事明敏縣長劉公委爲治安社長任職五旬頌聲盈耳年屆知命遽爾星沉傳播所及泫然流涕弟景泰和睦鄉黨克振家聲子錫三懸壺施醫鄉人咸謂橋梓章平後先映輝世罕其匹乃贈疏高阮清匾額以資表揚焉

本來稿

劉承曾祖籍魯父筱山流寓封邱因家焉母張氏縣北大馬寺人生女二子一子卽承曾性純孝貌溫和向無疾言厲色光緒三十四年秋筱山卒承曾方

幼小哀毀逾常見者爲動然家無恆產賴母氏針黹以養諸孤及承曾稍長入本邑染房習藝母則南走開封在木廠街傭工民國十年夏承曾往省母至夕值大雨宿於主人家午夜房傾竟被壓斃整年僅二十三歲以無力運葬厝於開封南門外叢塚中人咸悲之

見探訪

田岐瑞字肇祥邑東黑塔田人也性和藹好讀書弱冠遊泮以親老家貧遂設帳以供甘旨遊其門者實繁有徒一得薰陶類成知名士故一時書香大家爭先敦聘且宅心渾厚胸無城府與友居勸善規過與鄰處排難解紛皆一秉至公絕不黨同伐異父錫藩亦善士岐瑞聽命惟謹未敢稍拂及父病湯藥必嘗目不交睫者數日迨歿哀禮并盡猶深愧罔極未報時切風木之悲幸母董在堂八秩猶健岐瑞更竭力奉養以效老萊得承歡膝下也至民國

二十一年秋母忽無疾殞岐瑞痛而絕者再經多人百方勸慰始起勉行大事尋又河伯爲虐未得殯葬念茲之痛憂鬱日積于乙亥秋八月竟一病不起彌留之際直視親棺呻吟不已家人察其意屢祝之始瞑目而逝

見探訪

王廷楷字端甫王王村節孝馬氏仲嗣也性純篤幼穎慧少承家學壯卽採芹無詔無驕藹然可親其處家以孝聞其父誥去世時年甫六歲哀痛迫切父老警異及長常以不能事父爲遺憾是以於母之溫清定省固未有缺而荻畫之訓教誡之言又常書諸座右以作規臬焉及母病則衣不解帶湯藥親嘗夜輒籲天求代母卒一痛幾絕後經勸慰始行節哀乃遵制成服寢苫枕塊葬祭盡禮不御內不御樂不嘗葷性者三年如一日每與親舊道及無父無母之慘則不禁漣然淚下也其孝行如此至於立身致行則尤以吃虧爲

本旨兄弟叔侄間能分多潤寡親戚故舊拯艱救患解衣推食不吝嗇不望報現年雖耄老猶康健逾壯者云

本來稿纂

謝玉亭字卓人節孝雷氏子也世居縣東陳道村及玉亭遷城內父早亡常以不逮奉爲大憾事母至孝光緒三年歲入稔流寓開州既又傭工汴垣雖在貧困交迫中養親未嘗不周至自少而老從無一毫拂意處民國十年母病歿哀痛幾絕三年不茹葷不衣裘後遇忌辰壽日節期必設祭中庭率家人拜跪必盡禮數十年無稍懈且心懷惻怛性好施與有許姓家貧假以五十金焚券不令償佛溶孤苦館之終身不使去又悲舊居小東關貧鄉也流亡蕭條不堪寓目差多徭繁時患拮据於是凡遇攤派小款代爲捐出大款先爲墊辦更於青黃不接隆冬沍寒年關急迫之時衡窮苦之輕重爲施與之

多寡與饑有十觔五觔之差與米有一斗五升之殊又以村子多失學民國十六年在該村先醫廟創立初級小學校開辦及延師經費一身任之願謝非素豐甫脫凍餒卽能若此以故關內人士四方紳民於民國二十年以雅望桑梓區表其閭並置懿行屏以誌其德云

本謝氏家乘及採訪纂

任恤

人物略三

清

王夢麟字仁普歲貢生爲人淳朴勤謹自持治家有法待人有禮凡族黨姻親以緩急告者莫不應給人或以非禮相加絕不與較及有事干求則仍爲盡

力若盡忘前嫌云

本王氏家譜纂

叢曰欽字敬公監生曰正弟賦性孝弟能敦仁讓四齡失怙甫十八卽能立門

戶崇節儉不事紛華日以讀書爲事自秦漢而下以及宋儒諸子無不備覽
事母晨昏定省甘旨弗缺其事兄長恭而有禮凡事必讓而心始安訓子女
嚴而有體待童僕莊而能慈里有義舉知無不爲爲無不力有史姓拙於謀
生既與之金又周之粟史得不死又某負伊四百金或勸其構之訟答曰財
物有命得失在天人之負我命實主之過爲計較何益年五十有一卒易簣

之夕取平生之負券悉焚之曰吾非市義不爲子孫遺爭端耳

本襄氏
家訓

襄化茗字純如賦性豪邁處事慷慨周急濟貧傾囊不惜每鄰里有難解事聞
其一言無不立釋其姊丈負於官在縲絏中襄以身任之脫其桎梏而姊丈
得脫遠逸他方陷囹圄鬻產以償毫無怨意時洪水甫退民迫飢寒狡焉
思起邑宰委爲總練緝捕奸宄萬姓賴以安居太守聞其賢累辟不起築舍

村中鍵戶讀書勤樹藝有丈夫子七各習一藝家政肅然有鄧氏七業遺意
比閔張邦彥欲以其義請旌褒曰吾行吾志豈以要名乎力止之鄉黨愈以

淳誠相許云

本黃氏
家譜纂

張思德張素莊監生嘉慶二十三年黃河暴發幾破堤乃與張思齊等出資重
脩圈堤五里高寬與舊堤等知縣馬際泰爲之請獎上以急公好義匾額旌

之

見探
訪冊

章承瀛字仙洲章城集人嘉慶十五年生性孝友甘澹泊好讀書不慕榮利年
十九遊泮三十三食餼乙未領鄉薦大挑二等實授鄭州學正士皆嚮往之
受課者百有餘人丁未捷禮闈庚戌欽點戶部主事兼管福建直隸司咸豐
十年乞休還籍重鄉誼卹貧困初道光二十三年歲大饑曾開囊賑濟頌聲

載道四方共獻匾額誠不愧一方之義士也

本探訪冊錄

李志仁東李莊廉人也道光十三年路拾光武鎮全盛號錢票千餘串完璧歸

還分文不取邑令韓聞其行豎拾金不昧碑揚之

見探訪冊

侯建元馬村耆老性仁孝睦鄰里強暴欺凌絕不與較道光丁未歲大饑萬民

嗷嗷朝不謀夕侯惻然憫之發積粟數十石名爲作價意實周急蓋恐力微

供不給求未能徧及故出此耳鄰村人士得其救濟免分崩離析轉溝壑者

不下數十百家及歲豐或堅執歸還不獲已乃不權子母出券盡與之故遐

邇感德勒石晉額以誌之

本該氏家乘纂

王蓮字希周監生性坦易於人無忤排難解紛不避嫌怨人有睚眦得其一言

無不立釋故里黨咸景仰之咸豐辛酉東捻竄河西村焚廬舍掠財物僉議

築寨自衛以蓮素孚衆望請主其事蓮以年近古稀堅辭不獲乃令其長子
身任之大事稟命瑣務悉從衆議經營合義派款適中有陳曲逆分肉之譽
寨竣匪屢至衆寄以禦患者每千餘家處置妥帖無少參差同治八年於其
歸窆之辰四方立碑以誌德行云

見探訪

章恭先字敬亭仙洲猶子弱冠遊泮同治壬戌領鄉薦秉性剛直急公好義時
巨匪張宗愚甚猖獗該處以距縣較遠恐罹不測章慨然提倡築本集砦保
衛一隅出囊相助不惜巨貲無數民命賴以安全共樹德行貞珉以誌義舉

本探訪
冊幕

黃金臺字燕士封邱望族也居高產角村世有隱德家素不豐身兼耕讀未能
專力於學年三十始補博士弟子員合族家事一村公事皆一身擔負清咸

同間土匪蠢起到處搶劫略知事文光徧諭各鄉紳士着令襄辦修城四鄉紳士輪流支差鄉民分段做工工竣勞多者賞給六品頂戴金臺與焉及同治戊辰捻匪竄入封境各村男女老幼盡逃入城以避賊鋒金臺與村中強壯在家看守無何賊突至逃避不及被賊驅逐自上午至夜三鼓始得脫難頻死者數矣及賊去官兵尾其後接戰於城東岳寨村清將郭葆昌以劫寨謀洩受傷賊亦東去清兵盤踞城中四出撻糧搜掠一空不得已議該處修寨自衛因舉金臺爲寨主鳩工庇材幾歷寒暑至同治三年而工甫竣近年來土匪猖獗封邱四境多被劫掠而該村獨得無虞者非燕士修寨之力何克臻此至光緒丁丑歲大饑人相食其同胞兩弟餬口他鄉次年秋大熟自外旋里家仍四壁加以姐適陳橋楊某妹適小魯崗王某家皆赤貧金臺悉

以二子舌耕所得分贖之性孝友且仁慈養生送死悉本於禮自奉儉約而待人豐厚遇有鰥寡孤獨軫念尤甚晚年失明教子尤嚴迺以家貧至老不獲享一羊裘之煖而齋志以沒悲夫長子蔭棠另有事略次子蔭栢字子毓幼聆庭訓勵志讀書年弱冠卽補博士弟子性剛直晚歸和平爲文雄厚高古有奇氣勢如長江大海一瀉千里嘗遊學大梁與諸賢士大夫遊咸謂其伏取青紫易如拾芥不料文章憎命數奇不偶屢經鸚薦而竟不獲一雋窮達有命信哉旣以親老家貧內顧生憂不得已乃謀舌耕設教鄉里春風雨化作人實多封開兩境資以成名者不堪枚舉又常以德感人以財惠衆有此兩德頌聲雀起德行德教兩碑巍然矗立道旁信無愧矣今年已八十有四身猶強健不杖而行童顏鶴髮望而知爲積學碩士任縣志館主筆吮墨

揮毫臨文奔赴腕下所成諸稿多其筆削暇餘譚經說文賦詩源源本本層出不窮令人望之而莫能窺其津涯異日立傳文苑經學儒行殆將兼之皆

金臺深仁厚澤種德之所致云

本張鐘爲撰傳纂

高詠字頌齋東守宮村庠生慷慨好義扶危濟急每歲春冬盡力補助孤苦又

自設義學甄陶里中子弟而成全之故鄉人感戴敬畏爲矜式

見探訪

齊平字坦然縣東八里齊寨人也性明敏善決斷牾涉詩書而事來先覺雖機警者莫之辨嘉慶八年衡工決口自大工斜及黃陵良田盡變流沙知縣全福呈准豁免災差徭曾立碑和寨以記其事及後里胥爲奸更以支差病民相沿既久小民益形不堪平與和寨李振瀛等察其弊乃呼籲上憲陳明舊例屢訴屢駁煞費經營一經五載案始得結終將沙地支差永遠革除亦

立碑於和寨村迨民國六年官產處成立委員誤指沙河地爲官產兩岸居民羣起呼籲以無左證卒未見允後將全令豁免差徭及平請准復免差徭兩碑文拓之呈請上憲方證明此地實爲民產平不惟齊和二村之保障亦沙河沿岸二十四村之福星也封邱糟米向歸里書征收借死亡逃戶之名邀請富戶攤派幫項賊蠹萬民愈演愈甚延至三十畝之下等戶亦受此累平仍出首擬剔積弊旋因衆志不協平卽先從己村入手於所有逃戶悉爲訪出地丁相符使村內多數住戶永免幫派之累本村西北兩面均隣沙灘又率衆植柳以蔽飛沙村人皆得盡力南畝無飢困之虞自後臨沙一帶咸矜式焉有子二長廣明多義行各界敬贈德額表其閔次廣和亦長者紳民於民國二十五年又樹碑致頌云

本豁免差徭碑及齊氏家乘纂

李青嵩字春山號曉嵐和寨耆老寶冢子生於道光二十九年甫四歲而母劉見背賴祖母朱及繼母陳懷抱成人童年讀書敏而好學長從歲貢宋東菑遊府縣試輒列前茅一時文人咸以遠到期之詎世傳忠厚人易侮謾家本寒微箠瓢屢空且二老在堂猶待以事仰足乃改入縣刑房學徒境使之然非所願也在官熱心公事矢勤矢慎未及數年卽充該房經承歷任知縣及同人皆以飛筆李相許以夙受侵凌故喜抑強扶弱每遇訟事必先力爲解勸使之罷歸而後已倘有強硬仗勢罔陷於人則必多方彌縫不使弱者蒙大冤如宗祖李景海表弟劉欽均以非罪繫入獄朝饔夕殮旣所供給又出首幹旋上下辨別終賴其力以脫險諸如此類不一而足某年以吏員當考授職而念親老難背遂讓其事於王河莊友人王道周嗣官山西巡檢卽其

啓也且素整敕不苟同流俗已常粗衣蔬食而與祖母及叔父之喪葬則均竭盡其力他人雖以厚葬相譏亦所不顧對于家則凡弟妹婚嫁每年糧差糞土之費均以身任不稍推諉家中日用不足設寶興油店生意初用匠人係開州籍寄居車廂之王順堂李待之甚厚薪金之外時加周濟王兄某爲一跛叟子均不孝後以食指過多將來時所買地畝墊賠幾盡李爲製地八十畝以資補助更不足又將其住宅場圃盡售於李李但出價完糧房室之居住田地之收入不問也迨王兄弟夫婦死子去不返始收其田產爲已有焉然身居公門而恥刀筆吏令子弟耕讀傳家業儒者爲之延名師業農者爲之講孝弟甚或親身作則勞苦不辭遇年假恆抽閑旋里課子弟讀嚴加督責不稍姑息子往省少涉案卷則戒曰我已誤矣爾輩不可再誤歸好讀

書能使我爲書香人家卽佳子弟矣惜年祇五十有六先父母而逝

本採訪
冊纂

張銳字子剛張素莊人少有雋才光緒己丑登賢書明年應春官試報罷遂不求進取行善於鄉事闢公益罔艱罔鉅任勞任怨務求適當以惠州里封邑舊納糶糊錢於官糶糊者無名可指官吏捏飾勒取浮收以圖中飽蓋向日陋規之一也銳偕同志力請於上官方得豁免本處附近大小村落無慮十處有急難事悉委銳銳一切任之不辭千回百折卒如人人所欲爲後釀金貸息將設義塾惠寒峻惜志未竟而歿

本採訪
冊纂

張和之字仲甫關屯恩貢生光緒十年與李馬台恩貢楊松雲監生范景舜在知縣逢任內控車馬局勒漢糊捐事經年餘方得撤銷民國元年張充本社社長兼保衛團團長以辦事公允又蒙縣長郭之炎頒狀嘉獎云

本採訪
冊纂

朱采臣以字行監生光緒三年任蘭儀河口轉運六陳局長歲荒旱擇隣里老弱給以路費就食他鄉壯者給以資本運糧於河北平價出售或周濟貧困不責償還感其情者贈以德溢梓鄉匾額後任黃陵社長兼團總因地接直隸近山東河匪出沒無時對內排難解紛以息訟端對外捍禦兩省邊匪在公二十年社內寧謐巡按使田公察其特異獎勵熱心愛國獎狀民國三年年古稀卒於里里人立碑於村之南首以作紀念

木採訪
冊纂

張澂字字仙嵐焦啟子生而岐嶷長益端重寡言笑讀書善悟學有根抵不屑爲章句之儒作文理解清真非苟爲炳炳琅琅者弱冠補博士弟子旋即食餼二十人中輒冠其儔乃文章憎命秋闈屢薦不雋卒以明經終焉學優而有師姿故遠近學子樂與之遊生徒著錄者常滿堂而循循善誘隨其才之

高下學之深淺而爲之教科歲兩試列前茅者強半皆其弟子且熟於掌故練於時勢每一縣令來封遇有緊要公事必要與之磋商咸同間土寇蠶起徧地皆是所在騷擾四民迄無寧日時浙紹駱子木在任激宇與邊其恆諸紳謁縣君商議修城池集團練購槍械籌款釀金舉石運甃於西郊多壘之秋爲一勞永逸之計用子來之庶民成鉅工於不日庇材鳩工日不暇計厥後長槍會與捻匪兩次到境封城歸然如故非其提倡之力不及此吾封濱臨大河爲南北孔道歷來官兵恆必由之車馬送迎派差時胥吏夤緣爲姦至後雖非兵差亦一律支應小民不堪其苦激宇憫焉乃聯同人與縣長議立車馬局兵差則支應之非兵者一概謝絕局成而此弊遂除張任局事多年種種興利除弊之事不勝枚舉此其榮榮大者故誌之以示不忘也

爲誤
傳纂

王江字晴波大岸人幼業儒屢試不雋老精岐黃四方因病求醫者絡繹不絕江悉盡心診治不少推諉不僅不受診金拒絕謝儀也每歲又與黃陵集某藥店錢二百千文以作貧困藥資更於病無以養之人助之米麥俾臻康樂因之遐邇感德於其仙遊之日公勒貞珉於通衢以誌芳行云

本採訪冊纂

民國

衡勤字勉齋大工節孝魏氏子也歲餘失怙與母居養家赤貧無衣食業雖有祖遺灘地若干畝而悉濱黃沙被水冲淹化爲烏有家又有龍鍾膈高之祖母朝夕待養其母魏雖賢而多才終屬女流操勞之事故必親身獨任之衡至性天賦未讀書而自能明理幼而知愛稍長知敬凡少儀內則之所載胥

能身體而力行之且性好施與因家貧不能從心徒呼負負嗣因灘地閃出
日用漸裕而母魏復善居積賢內助不憚勤劬因之財產日廣而夙願可酬
矣大工村接黃河柳園官渡往來過客恆信宿其地衡皆待之以禮款之以
情數十年未嘗厭倦厥後善譽遠播卽遠地之不相識不知名者亦聞風來
投有鄭當時之遺風焉大堤鄰近數村強半多沙灘地離家既遠苦無路徑
每逢秋收轉運維艱故野間露積崇墉不能達里衡乃陸續買地幾段作路
一條長有數里使鄰村共由至今爲坦途矣連任社長十餘年辦理事務在
在妥善閭社悉稱福星後因萑苻不靖移家縣內南街南街之貧黎沾其惠
者爭奔走焉生子三長廷傑仲廷俊季廷彥均慷慨好義有父風

本誌行
碑序纂

齊家順字和中縣東齊寨人也素業農性篤實光緒三年千里童童賴其勤身

貿易舉家衣食方足供給厥後益儉田產漸裕然能儉而不吝勤而好施其女弟適羅問孫氏女適東關馬氏均綦貧且早孀兩家人口卒得保全胥家順周濟之力族叔義老無所歸迎養以送終族孫慶運少孤放蕩得其飲食教誨遂以成立又見族屬繁而散處代遠系湮不相親睦也乃提倡修家譜建祠堂以聯族情使向之視若路人者胥敦睦焉且力成私塾培養人才學制既更又改作男女兩校延請名師以期推廣教育俾本處莘莘學子咸沐浴我作人之化本村逼居沙河南岸原有舊社植柳河身以禦沙走邇來村東之沙踰河而南臨河數村大受其害家順又倡結小社將沙堆概植荊柘雜木使沙不能移動南原胥成沃壤故一方士庶勒石以表之長子廣玉仍業農急人之急亦如之次子廣彩少篤學師範畢業歷任縣教育會祕書及

財務會事務主任職

本誌行碑序及齊氏家乘纂

王執中字子允號西山世居邑北劉莊望族也幼而聰穎長益慧敏孝弟克敦於家禮讓見稱於里因寡兄弟讀書未竟納粟入成均厥後洞悉世故熟練人情應事接物無不動中機宜而於地方之利弊民物之休戚益究心焉封邑地瘠民貧而差徭頗重徵收之際釐捐爲分相延成例執中惻然憫之於是約會同志呈控除此陋規備有成案立碑爲誌民國初年停科考興學校然風氣未開四鄉猶落落也執中熱心教育爲本村創立小學俾族黨子弟之秀者皆入其中而師之修金膳費均自任之迄今遞有成效班班可考故其歸窆之辰四鄉親友爲之樹碑褒德云

本誌行碑序纂

謝塘字子鑑陳道人幼沉靜無狂言妄語勤學嗜讀應童子試屢列前茅以科

考停父老弟幼遂兼理家務無意進取設立義塾不受修金使貧寒子弟亦得讀書識字又博覽醫書擇要方配丸散施舍數十年全活甚衆年方強仕倏而溘逝民國十八年鄉里爲樹碑誌德云

本誌行碑序及謝氏家乘纂

徐子鎔字鑠卿清生員工詩賦能文章於經史子集無不鑽研瞭然有獨到之處及清改制鄉里耆舊多持故習攻詰時政子鎔獨審時度勢興學育才後進爲所成就者甚衆民國建元後豫省兵燹數經萑苻蠭起以子鎔聲望素孚鄉黨依爲保障乃立禁約嚴部勒防禦周至閭里賴以安識者多惜其緒餘僅見未獲大展厥抱也邑令鞏霽堂旌其門浙江邵次公贊曰封父之丘實產寶璜齊齊徐公玄德孔彰壯橫經於東序晚禁讖於粉鄉旣仁且職詩秘其香神遠躐而如在澤趙繚以允長親鑿楹之遺教嗟後昆兮毋忘

錄來

王俊三字子傑小魯崗人茂春長子生而敦篤內質直事親能以色養與弟函
三友子極篤內行修潔一鄉稱爲善士幼承家學六經四子皆能通曉大義
旋以歲試入開封郡庠既而遊大梁書院益肆力立於古文詞章左國史漢
無不窺覽於是文聲藉藉徧一時焉宣統末年迺糾合同人倡辦留橫新善
鄉高初兩等小學堂款項絕無純恃人力搆柱俊三任堂長注重中學而科
學次之功課完善則生徒鱗集洎其堂弟甲三到校任教員職二十餘年每
遇會考或畢業蒙上獎勵獨優省視學批爲豫北模範迨其辭校長而爲紳
馬社長實心任事不辭勞瘁一意爲社會造福每村莊遇有口角或鬥毆幾
至興訟者俱先詣之使評其屈直俊三輒直言不諱孰是孰非詞嚴義正令
兩造各無異言而其事遂寢且好獎掖後進樂善不倦同人遇有才德出衆

堪爲師資者必折節與交惟恐交臂失之生一子名連中邑庠生孫三長佩

曾次佩良又次佩成俱小學畢業有德行碑現存該村

本誌行
碑序纂

葛奉先字孝卿城東寺上人性溫和篤孝友弱冠遊泮不斤斤家人生產其教

子弟以孝悌忠信務使文行交脩悉屏澆薄習家居設科不受脩金而教之

未嘗不盡清末任勸學員竭力勸導開辦學堂數處暇則瀏覽時務醫藥書

籍故精岐黃拯人沉痾無算以故戚友戴德樹碑表揚子明倫清庠生民初

任縣議會議長議定糶米公催以蘇民困車馬附款用助學校云

本葛氏
家乘纂

侯錫爵字廷彥世居馬村爲封望族代著厚德道光丁未歲大饑其曾祖建元

貸粟還券豐碑巍然本生祖松及祖傑均太學生以忠厚忍讓世其家父玉

朝武庠生爲社首以辦籌防獎六品銜錫爵早歲由冠軍入邑庠失怙後理

家政授生徒以端品篤行爲教逮清末業社內舉爲社長縣令委社學董因提撥五龍庵廟產等設初級學校宣統辛亥武昌起義匪徒蠱擾馬村毗連直境爲警尤其當道委辦守望衆請於官推總社事卽悉心籌查商之各莊長購槍械查戶口操練既精盜源以絕是年十二月匪掠光武鎮商肆錫爵聞警督衆邀獲全勝嗣匪等屢犯村以防堵嚴迄無恙時旣平守望改組縣令又委爲保衛團團長新款日煩急於星火乃曲爲勸諭一切稅務可緩者緩之必不可始秉公分任其事盡心蓋己苦矣自爲社長事必躬親皆準人情持公理一時以細故紛爭者輒就剖白必極力寬解使息訟卽有眚直斥其非罔不佩服云且秉性方直處事謹慎事親孝持家嚴壽於奉己豐以待人爲人謀必忠與人交必信而排難解紛抑強扶弱毅如也長子文波邑廩

生曾任第四區區長三子蓮波邑庠生河南優師畢業曾任本縣第一小學

校長現充沁陽中學教員

本侯氏
家乘纂

楊開瑞字兆祥后河人性慷慨好施與博愛主義原屬素具痛鄉鄙私塾不足以迪青年乃毅然創設國民小學校以作育才之基而鄉民亦使民國八年瘟癘流行勢張甚朝健啖而夕殭斃者累相屬也時其家嗣眉齡長陽封河務局供職開封卽飛書囑速市藥廣施遠近活人無算九年旱災奇重中費

之家幾不自保楊惻然憂之無何賑糧下施自冬徂春迭次散放災民驟獲異數詫喜交並後知眉齡稟承父意在汴幹旋之效而楊究未嘗以此自足其生平排難解紛恤孤濟衆義行多端不勝枚舉民國十三年紳民爲樹德

行碑以誌景仰云

本李時燦爲撰
誌行碑序纂

張顯琫字珍齋張素莊人性仁慈才明敏少知名弱冠遊泮與伯兄同宅而居親睦雍肅終身無間事親至孝母疾奉侍湯藥三月無忘容外祖母家貧俱給衣錢及卒又俱衣棺以葬長妹中年寡而子早夭遺媳孫女家寒柴米一一給之設帳授徒不計學費不受脩金後任社長值奉軍過境盡心勞力支車馬牲口悉歸自備衆不受累鄉里恭送公正廉潔望重桑梓匾額報之又

創立初級小學一處以培人材辦理完善鄧縣長嘉獎爲模範小學校云

本探

訪冊纂

王信字孚齋小韓邱人幼家貧業農矢勤矢儉漸臻完合然儉而不吝親族有急莫不周濟遇飢饉輒出糧米約貧民分食後之償否在所不計以故親族

感戴恭送德及鄰里匾額

本探訪

姚鐵允天鵝波人與弟亮異居度日均仗義疏財廣行善舉里人慕其德各勒

貞珉以誌不忘

本探
纂冊

杜長庚黃莊人謙恭忍讓重義輕利鄉里戴德爲懸匾額立碑以揚之

本探訪
冊纂

何沐恩字貢波李莊邑庠生性剛毅識時務視清末人情齟齬實業不興遂創

立學校提倡鑿井改良種植捨藥以救急症挖渠以通水利本其學識作種

種利濟事後皆能收實效是以門人建石作紀念云

本爲立德
教碑序纂

石金鏡字子明石莊人性仁愛學純正曾任縣保衛團總及治安社長關心民

瘼急圖治安城鄉戴德公送素孚衆望匾額現年八十

見探
訪冊

文學

人物略四

清

封邱縣續志

卷十五

人物略 文學

三十三

開封新豫印刷所承印

邊佑字鍾毓封邱名宿也幼沉靜肆力於學經史而外諸子百家無所不讀弱冠舉茂才每科歲兩試輒第一家藜貧土坐茅檐僅可容書史自食餼以後益加刻勵會又逢湯學使案臨奇其文獎以獨榜且曰勉自愛鸞坡視草當讓君冠石渠焉不憶文章憎命棘闈輒鑿諸同人惜之多爲作感遇賦及授徒因材施教不拘一格不數歲門弟子拾餘唾者皆膺選拔登賢書立致通顯而佑仍一編兀坐泊如也生平尙氣節處已待人毅然不苟親故遇之皆改容示敬無敢不尊稍有不善惟恐其知蓋以嚴見憚其素所樹立然也晚以明經司訓榮澤抵任後多士踵於其門俱求看課遂於學署內設講席焉先是榮澤少達人數歲不第後得其教遇秋闈輒雋且不僅一二人於是榮澤有功在作人澤能造士之頌在任七載不可干以私會差役繁重諸生多

告濫派邑宰怒請於佑欲革一二人以抒私憤佑執不可宰銜之值其短終
不可得年八十致仕歸兩目炯炯猶能作細楷嘗語人曰吾以老諸生得薄
宦一生事蹟不能備述惟居不愧衾行不愧影尙堪爲子孫留清白耳齋中
設書百卷雜以茶鑑藥籠人問其故則曰吾以娛晚景也壁間多格言凡古
人善蹟嫩行輒錄之以爲子孫戒喜談文故舊子弟必曲加開導而使之自

底於成年九十有一而終

本邊氏
家譜纂

何家琪字吟秋天根其別號也傳興子具宿慧負奇氣自爲兒時已矯然異於
衆初從父任山左得與王芷庭先生遊博稽羣書下筆數千言立就十三歲
厥考歿黃縣任所奉祖父僑於濟寧與齊魯諸名宿講有用之學飲酒賦詩
文益恣肆同治時中順天河南兩省副車光緒乙亥登河南賢書計偕入都

春闈報罷因時事維艱惕然於彝倫之攸斲遂絕意仕進不得已就洛陽教諭職以求著書立說爲剝復貞元之計當其官洛陽時作務實篇以勗士子且言君臣之義根於天性讀書人若忘國家尙誰是賴又於古文辭申明義理期於有物有序洛下一時人文蔚起實受其賜俸滿陞汝南教授著講學約規講志聖社規於古文方再三至意其作人之盛更愈於在洛時是以文化所及他邦俊彥莫不想望其丰采孟津許石衡奇士也數百里負笈進詣汝南先生館之學齋許樓款留浹旬縱談古今文藝及修己治人之道循循善誘維詳維盡石衡讀其文擊節稱賞極端形容不盡其美誠得韓歐之奧而入太史公之室也且以賢而不遇抑鬱阨塞磊落不平之氣時露於言外出諸文則有雲淵之妙見之字則有歐褚之精微諸詩則有蘇陸之逸乃邦

家之光非止閭里之榮也奈何昊天不吊長子愛姬相繼逝世既喪其明又碎厥玉多愁多病之身奚以堪此竟疽發腦後卒於汝南官次惜哉弟子石衡聞變往理其喪並搜輯其著述以計藏之名山傳諸其人其有文十二卷詩十卷駢文一卷質言一卷冷語一卷詩鐘一卷疏碧堂試帖詩一卷古文方論文約惜古文三十四品一卷經義擬自宋明人至乾嘉老輩五卷張靜孃花月痕一卷茲古文方已刊除天根文鈔四卷天根詩鈔二卷自刊外餘存

洛陽待刊本省學使王爵生爲之傳其文已列入本志文徵內

本天根文鈔及龍鬚山房

文集

纂

李魯齋以字行李塞增生咸同間屢薦未雋攻苦砥礪學有淵源設帳黃陵每作古文時藝人爭誦之一時蒸起之士如增生趙文源趙文蔚文生郭延祖

翰林院牛東藩皆其及門弟子外此大河南北桃李滿門文風爲之不振實

魯齋有以開之

本探訪冊

宋東菑字春農號笠夫縣南街寒士也性穎悟爲文清拔絕俗峭不傷雅麗不失纖應試於小題虛題尤工補學官弟子旋冠軍食餼自是每試輒列前茅但秋闈未雋以明經終焉又工書法初宗鍾王繼師率更中年以後更肆力於松雪筆意蒼勁楷書秀整行草更入能品可書者戶外踵相接絹牋綾楮堆滿几上近年來有得其片紙隻字者恆寶之且其學有根柢六經四子外四史左國莊騷及魏晉以來之文選詩集無不窺故其爲文不蹈尋常恆徑年近八旬無病而終

本探訪纂

黃蔭棠字景召燕士長子增生黃蔭枏胞兄也性豪爽才敏捷以庭訓之美弱

冠卽補博士弟子員同治癸酉科以廩生試選拔正場皆列高等及覆試大宗師坐堂監視賦詩一章當而判斷舍取題爲俊鶴撤鞵天欲霜揣摹旣成一矢破的全詩姑無盡述中有句云激昂開倦眼冷淡洗平空惟肖惟妙似有神助大宗師閱畢卽提朱筆連圈甚覺得意選拔之獲實本於此至朝考期不幸以內艱未得赴試屆乙酉又逢選卹例當補考又以外艱未與後逢大比昆仲二人同入棘闈以爲前失後得亦正途應爾奈數奇不偶雖經鸚薦而終不獲一雋惜哉以磊落英多之才文章事業見重當時而竟不獲一小試此有心者所扼腕而不能平者也旣以道旣不行於當時卽思傳道於來世發歸與之歎抱裁成之懷設絳帳布春風一時學者遊泮食餼固難枚舉而封祥滑三境之名下士半沾時雨化成之與其弟談經論文疊相折衷

直相月且有洛下明道伊川遺風然伯氏心氣和平與不擇人似柳下之和仲氏秉性剛直友必正士似伯夷之清仲氏晚年亦涵養逾粹渣滓悉泯明道之目中有妓心中無妓伊川究未嘗不能也吁盛哉後以地方不靖悍匪蠢起吾邑奉令在縣設立守望總會以其素孚衆望舉爲會長義務所迫本非其志爾時年幾八十精力尙強然以公事忙碌應酬分繁竟以勞致疾告歸死長子夢賚字肖說邑庠生次子夢錫字延齡前充本縣政務警察隊長排難解紛人皆以魯仲連呼之門弟子及紳民以黃昆仲品學兼優爲樹

德行德教兩碑

本張鐘爲撰傳纂

張清源字正本世居城東黃村營其大父義業農有隱德其父學孔業儒以家貧親老棄讀而耕鄉黨稱爲善人清源稟性直諒質實無文飾自少敏而好

學稍長卽從拔貢黃景召先生遊爲文清刻透露無塵腐氣咸謂取清紫如拾芥乃府縣試屢列前茅而遇道考輒黜羽同人皆扼腕不平而張絕不在意年近而立始博一衿旋食餼宣統元年以恩貢入成均初光緒二三年歲薦饑人相食其祖母與其父猶相繼逝世不欲坐以待斃乃覓食至歸德之永城教讀於廩生李培臺家顧老母在堂慮痛嚙指麥未及熟而卽歸省執意遊子初還慈病垂危旋抱無涯之戚以哀甚內傷外染時疫累月臥牀不起賴族弟清河左右調護多方醫治方得全愈然命雖存而家徒四壁不得不復理舊業以掇未死之餘生無何館於長垣趙莊蔡宅學生同潤合潤蔡家伯叔昆仲也受業三年同遊泮水東翁素豐待師有禮後撤帳歸室仍懸幣蔡氏二生念師不忘時常命駕來謁或齎粟米或餉泉刀原原而來數十

年如一日清源友教四方所居非一地所主非一家然盡聚相得去相思則平日之待弟子爲若何斷可識已其性素簡默寡交遊惟與張謙光石印川齊會元溫廉泉諸同硯稱莫逆然年悉少於清源故以兄事之而清源亦以弟待諸子後皆成名頭顱皤皤清源猶時呼其名而不字諸子非惟不忤且歡忭承之若恐稍違其意者卽諸家子弟歲時饋遺相對亦如其父兄有易

堂九子遺風焉

本採訪冊纂

鄭貽哲字曉亭縣東四十五里黃陵附生先世居魯之曹縣至其三世祖始遷封爲封人父倫秀業儒嚴正有儀不苟遊戲道光乙未曉亭生七歲入學父卽嘆其生性異常年十二果以制義囿於法律不能闡發經義奧旨遂薄功名不淪流俗甫弱冠遵慈命行商數月無所得乃棄去咸豐五年銅瓦廂決

口黃水滿院猶讀書不輟適有左傳一部漂出乾以日頌其章句審其脈絡
玩其筆墨沉潛反覆玩索有得試之文始覺氣機充暢有沮莫能沮之致年
二十有七繼室杜亡以親老奉養需人乃舌耕於本集以便晨昏門人得其
風雨之化而游泮者多其人年三十五厥考卒哭甚哀資其門人賻助喪葬
始克盡禮以伏處守制卽重修家乘回原籍視事越十餘載以鄉試屢薦不
雋乃歸而著孔文齋管一卷欲傳其學於來世既以次子恆若喪乃益絕意
功名著春秋本義十二卷孝經刊誤繼志一卷呈本學訓導樊愷臣愷臣轉
呈汲縣李敏修較正繼著四書大學貫二卷知縣陳慶愷償之爲設義學於
本集以資上達本省學憲徐繼儒見其書題以潛研義理確有心得提升明
道書院因辭不赴欲著某書

自訂年譜此處
損失書名無攷

以目疾止年七十有二猶著樂

記三卷二卷自鈔餘次媳孫董成之生平衣食有節每逢朔望講書必具衣冠以往岸然道貌醉面盎背遙望之卽知爲道學中人非名利客也次年卒壽七十有三彌留之際遺囑季子方叔次子妻孫元善當寶存已著遺稿節儉後事不宜停喪遲葬語畢從容而逝

本其白訂
年譜纂

黃錦字繡齋鶴鳴子性剛直重然諾好負氣當面折人過失一時同人皆樂受以其言出至誠故無怨者市有酒狂好使酒寔踞嫚罵或有從旁勸之酒狂仍刺刺不休忽有人大呼曰黃繡齋至矣其人遽嗒然不敢稍作聲唯唯而去素承家訓好讀書歷寒暑不輟弱冠補博士弟子員旋食餼肄業大梁書院每欲奮志雲霄以親老不得遂其志乃歸里設峯比教授生徒一時桃李多出其門其父歸道山後錦卽欲繼父志嘗奮然曰吾父旣歿若不能博一

第以光泉壤何以爲人惜志大而數不偶入棘園屢蒙鶚薦而終未獲一雋
晚以明經終焉嗣後清廷變法停科甲開學校乃襄知縣黃庭芝訓導樊振
家創立高等小學堂繼又自立初級小學堂培植人才振起文風熱心教育
可知其生平急公好義救災恤貧鄉里慕其德以恩明義美頌其門

本張鐘
爲撰傳

纂

甯雲衢字步仙縣東大里薛歲貢幼稟家學卽束身規矩不失繩尺內行修潔
克敦孝弟稍長出就外傳博學無方故得早年遊泮食餼雖文章憎命未獲
捷足青雲然腹笥便便久已籍甚人口無論六經四子皆能提要鉤玄卽下
至地理卜筮飛星六壬之術亦無不旁推交通爲專門所不逮且其性平易
近人與物無忤所以鄉鄰父老親戚故舊於歲時伏臘之會無不誼美而恩

明而野人俗子下吏走徒偶而相遇亦必接之以禮溫溫乎惟恐傷之是以人無論智愚識與不識對之皆肅然起敬頓消其不肖之心蓋夙昔之所樹立者然也至於設科一節則又因材而篤循循善誘士之登其堂者每試輒列前茅故門下濟濟吾邑稱最其生平讀書以師友爲性命與黃景召焦調南稱莫逆交每逢花朝月夜三人說詩聯牀令人聽之娓娓忘倦焉常談及宋儒蜀洛之黨謂程與蘇皆君子而意見柄鑿乃解云風流道學其流不同故見各異耳晚年愈整勅清嗜慾樂遂養志甘林下不慕榮利宣統元年被舉爲縣議員堅辭不就家居令孫曾執卷咿唔其側則欣然喜蓋以平日所樂者在此壽八十有五鄉人嘉其懿行樹碑誌德並以品學兼優額其門云

張謙光字遜卿縣內邊胡同人幼穎悟長就外傳六經四子過目成誦從本縣黃景召遊時年十有七與同學諸生昕夕切劘相得甚歡無何補博士弟子旋即食餼二十人中每試冠其羣友教四方所在弟子濟濟盈庭師生之際情誼霽如一相從終身服膺不倦其德意之感人有如此者又工書法筆力遒勁一落紙動爲人取去閭邑匾額屏帳率出其手故遠近求書者戶外之屨長滿光緒甲辰年僅六十有六壽終長子金波廩膳生能承家學

本探訪纂

張國棠字芾軒一號守拙封邱績學士也以諸生設教授徒終其身及之者敬之聞之者仰之非有奇節異行而篤行守道不苟進取自以爲拙與世無爭忤此已爲常人所難能矣家貧世業儒父子清尤嗜讀書有子五國棠其仲生性純篤承先志好學補博士弟子員卽課大梁書院有聲於時適有清遜

政遂歸里以教讀爲餽粥謀先後應本縣邊氏高氏吳氏及滑邑何氏汲縣李敏修經正書社國文長教之聘在本縣創立職業學校所至不計聘金重道義循循善誘故門下多知名士咸爲世用此亦隱居求志者之所樂者乎且其事親孝兄弟無間言持身嚴正片紙不入公門居家無私積親丁數十口雍睦一堂爲鄉里望子弟因才習商事畊讀無失業者處世以凡事退一步想垂爲良箴尤素欽曾文正書蔬肉魚早掃考寶之訓遵爲治家法民國

十九年歲五十有九逝世


本田文荃撰傳墓

賈書山字酉菴陶北人幼篤學弱冠列庠以困於秋闈設帳四十餘年誨人不倦成就後學綦多生性寬和與人從無睚眚民國二十年地方荏苒不靖被盜擄去至里許聞其聲音盜曰此酉菴先生也不宜相犯曷速送還勿使受

驚其感化強暴諸多類是又博覽羣書年七十餘手不釋卷所著有聞見隨

筆六册爲衆所欣賞

本採訪
册纂



封邱縣續志卷十六

人物略

略二

武烈

人物略五

清

張霞舉油房人少有胆略多武勇長習弓馬遂應武舉獲雋嘉慶中葉邪教紛起有齊王氏劉之協者以左道惑人人多從之乃圖爲不軌始僅劫掠近縣後益猖獗四川山西兩湖河南蹂躪幾徧官兵屢討之不能勝霞舉奉檄率衆往勦輒克之後與齊王氏戰於襄陽賊敗走霞舉尾之繞樹酣鬪二小時霞舉中槍兩次仍不舍卒擒之以歸賊首旣獲則餘賊不戰自潰數省得以靖謐者數十年皆霞舉力後以軍功薦至廣西游擊子蕉啟以明經登賢

書學術優長試春官不第就教職終任伊陽教諭

本黃恂撰
課傳纂

王懷玉西林莊人道光甲午科武舉乙未進士授直隸太甯鎮易州營中軍守備在官盡職調陞大名府鎮杜勝營都司咸豐五年直隸總督桂札派開杜東長四營兵委其總理由大沽副將珠隆阿帶統赴河南蘭儀北部之姜家樓一帶河干防禦六年正月調赴歸德勦匪二十日到防晦日即在石榴古寨接獲勝遂將四營兵交給河北鎮崇統領二三四五等月與賊在府東南蔡家道口屢次開戰均獲大勝六月間戰於亳州北關河之北岸連勝數陣身多受傷上聞陞江西萬安營督司賞戴藍翎八月五日在亳州東北湯王墓地方與賊接戰全勝而歸然前傷復發初十日身故營中子清泉從父出兵據實上聞賜銀葬祭入衛輝及亳州昭忠祠贈雲騎尉世職子清泉襲子

亡孫良臣繼均歸標學習補敘

見檣卷

萬振邦字顯朝明進士萬泰裔也生於嘉慶十七年道光己亥武舉授武略騎尉署理撫標左營把總事咸豐二年九月十九日隨河北鎮與太平天國軍戰於湖南省城西之牛頭洲陣亡卹銀一百五十兩贈雲騎尉世職族姪鵬飛承襲令其歸標學習補敘鵬飛死振邦應繼孫鴻恩稟官相爭上憲卽改以鴻恩嗣

本檣卷纂

趙海晏本名河清辛莊人邑庠生性伉直有胆略咸豐十一年十二月初三日長槍會匪過境趙命兩弟護父母眷屬赴縣避難已率領鄉團在本村禦賊賊猝至趙持矛擊之有勸其去者趙慨然曰我方謀與衆殺賊何去爲衆笑其迂相率逃避趙以孤立無助被刀斫傷數處罵不絕口而死時年三十有

八上聞給卹銀七十兩贈雲騎尉世職入忠義祠子象賢襲歸標學習補敍

本
稿
卷
墓

鄭永泰字石卿封邱七城人咸豐五年由行伍投入河南撫標統帶義方營時
擒匪猖獗固守歸德八年克復安徽天長縣十一年調赴直隸一帶助剿六
月初五日克復莘縣城身受矛傷兩處同治元年三月攻打邢家灣賊圩
而受鎗傷九月兼統義方營馬隊調赴陝西剿擒二年調回河南在汝甯地
方攻剿包黃二逆身先士卒右腿左手受傷五年派赴前敵督隊追剿迭勝
睢州考城商邱上蔡等處擒匪六年奉派江蘇淮海偵探軍情時南皮張文
達公督漕河奇其才奏留清淮委統漕標馬步隊赴六塘河助剿八月中旬
乘夜渡河連破賊營三座十二月十一日賊竄淮揚跟跡追剿斬獲無算生

擒逆首賴文洸於揚州全股蕩平自光緒元年至十五年在淮徐海一帶或平股匪或獲渠魁先後數十起以軍功擢至總兵奉詔賞給克勇巴圖魯名號及二品銜並晉封建威將軍嗣以積勞成疾臥病十二寒暑於光緒二十六年卒於清江浦寓後地方紳耆戴德稟請漕督轉奏附祀張文達公祠

錄來

稿

衡萬清字子廉大工人少壯之時任職河務曾經河帥許派職外委接鈐任事屢建偉績嗣由把總千總復蒙河帥錫札委護理懷河營黃沁協備不數年間官職頻陞歷任中河協備下河守備及民國五年萬清年已桑榆復經河防局調署鄭中支隊長繼得獎勵六等文虎章其生平熟練河務洞悉公事黃河兩岸無論委派何汛均無汛濫之患久爲河營矯矯特出之偉人尤可

羨者其處桑梓急公好義凡遇人有婚嫁喪葬等事無不出資傾囊代爲辦理民國二年封邱縣二十六社車馬每銀一兩增錢四百文萬清慮沿河一帶地畝盡屬堤壓柳佔沙漠不毛差久賠累何堪再增復值黃河塌陷完納丁漕實屬無力萬清任職在外急令長子文運協同鄉紳莊長呈准減征車馬蠲免丁銀爲同鄉除永遠之害後至歸窆之辰同鄉恨無以爲報爰泐石

銘功以誌之

本採訪冊纂

時大量邑人咸豐十一年流寇入境與練鄉團禦賊陣亡妻王氏守節不貳見採訪田來宗田淳子人務農爲業之無不識頗明大義聞土匪肆虐常以不能從戎破敵爲恨咸豐十一年臘月初三日長槍會匪過境田適在家賊衆猝至執之勸其降勃然怒曰我本良民安肯從爾賊逼之以刃不爲動衆刺以矛遂

罵賊不屈死時年三十有二

楊朝重田淳于人謹愿老成鄉里推重當咸豐十一年臘月初三日長槍會匪過境衆皆倉皇奔竄楊獨安然不懼賊至執之使炊爨不從且肆口大罵賊怒縛而殺之時年四十有八

張彥魁油房人身魁梧性質直當太平天國軍入豫境時嘗歎曰惜予門衰祚薄不能投軍効力徒生一世耳及聞捻匪奔竄蹂躪又撫膺痛恨不已至咸豐十一年臘月初三日長槍會匪過境初村外有邊馬十餘匹衆皆逃避張獨仗刀前往直意謂殲除易易轉戰移時殺賊二名賊少卻張退入柿林暫息賊號招其羣遂大至被圍園中而死時年六十

傅國賢傅家莊人封邱舊族幼讀詩書頗明大義嗣因家貧棄讀業農咸豐季

年土匪尙熾封邑河防尤爲吃緊辦聯莊會傳卽入邑紳邊其恆鄉團該年臘月初二日長槍會匪東歸蹂躪懷慶各縣將擾封境傳從團長出而迎敵自陽武西轉戰至祥屬之九家莊死焉賊去後子侄往覓屍骸猶手握利刃怒目若向敵然年三十有六歲

黃作霖黃莊農家子素有勇力耕作兼人聞東匪長槍會竄至懷慶約本村壯丁十餘名具兵刃計保衛身家於賊至之前二日悉送老弱避難城中已與少壯礪兵以待及賊至衆知不敵謀共奔逃黃獨挺刃殿後出村不二里條有邊馬自歧路出黃率衆迎擊賊少卻黃急追去同伴羣呼曰莫追賊三面至突衆各奔逃黃審視已爲賊十騎所圍乃大力格鬥移時砍傷賊馬二匹羣賊舍馬抽刀齊舉遂遇害年三十有五

溫立成閭店人因居近垣境志在禦賊保護桑梓故充長垣武舉呂蘭昌團勇防河巡邊屢著勤勞及咸豐十一年臘月初四日長槍會匪入境隨練長在長垣南二十里王堤與敵接仗轉戰竟日斃賊數名終至力竭陣亡

溫廷相閭店人立成之侄幼習農業志在四方雖竭力耕田然常有宗愆長風之志咸豐末年土匪攪亂聞垣紳呂蘭昌約聯莊會欣然從之迨長槍賊自西東歸住宿封境蔓延約數十里次日大霧漫天咫尺不辨溫叔侄與團衆在堤北伏伺已久值凍餒交迫之際猝然遇賊人爭向敵奮不顧身終以寡不敵衆逃竄無遺廷相更因叔父年邁左右護持遂與之俱死

李國武裴固人本農家子居址去縣較遠又係邊境爲防患守夜計熟習拳勇東匪滋事長垣武舉呂蘭昌約練鄉團李聞之慨然曰此正余効命立功之

時也因從操練當咸豐十一年十二月初四日長槍會匪過境時呂團長預於前日率衆扼要以待李與從弟國玉偕本村練勇與焉至日大霧瀰漫出村三四里遇賊猝戰終以寡不敵衆咫尺莫辨鬥力移時遂及于難時年五十有一

李國玉國武從弟隨兄荷戈赴敵見兄被害奮力拯救同行者僅耿氏叔侄二人國玉知不免大呼曰願從我者只有死三人一擁向前立斃數賊衆寡不敵遂及于難時年五十

耿子佩裴固人耿子明堂弟子明年老步履維艱聞長垣呂蘭昌練勇捍衛卽命子隨叔入團當咸豐十一年十二月初三日長槍匪攪封呂蘭昌預令從團各村分伏擊賊長垣練勇伏在東北兩處預備截擊封邱練勇先伏桑林

乘其不備突出追剿使賊四面受敵則事可成故裴固等勇于初四日天未明時礮兵辱食以待及聞東北炮銃轟震齊出赴敵不意賊衆過多子佩遂與侄同及于難時年三十有一

耿先子佩堂侄奉父命隨團爲勇勵志武技衆所推服村中練勇咸聽指揮咸豐十一年十二月初四日率衆赴敵大霧漫天不辨東西賊甚猖獗圍勇不

支隨叔父殺賊向義而死年四十有六

以上十一人各恤銀十二兩五錢

李書香獐鹿市人咸豐十一年十二月初二日長槍會匪自西而東夜視火光約在陽武城東村中老弱驚惶無措書香素有胆略勸勿妄動黑夜奔逃恐有舛錯余願率少壯數人前往偵探如尙遠伺明晨向城內疾馳未晚衆是其言但莫敢與俱李憤欲獨往父老共勸阻之黎明令其家人隨衆東逃已

獨倚戈而西出村不五里遇賊邊馬二匹書香以戈擊之一墮馬一馳去羣賊望見遂大至爲賊所獲勸之降不屈怒目切齒罵不絕口賊刺殺之

王文炳獐鹿市人咸豐十一年冬長槍匪攪覃懷時懷屬之陽武毗連封邱獐鹿市相距尤近臘月初二日該村聞賊猝至相率逃去文煥勸兄文炳逃炳慨然曰吾與若年逼桑榆死何足懼但恨不能爲國殺賊耳頃之賊齧至文炳坐門首不動煥亦不肯相離賊破門欲入文炳叱賊不得無禮賊揮刃中其肩文炳怒罵不休弟代爲乞命賊不聽遂殺之年六十有七

王文煥文炳弟因兄死於非命欲屈全以收其尸爲賊脅去至邑東北二十五里之潘店止宿次日黎明賊悉東行文煥見賊漸少踰短牆西歸餘賊覩而逐之遂止步罵賊而死時年六十有二

邵祿黃陵人本該集趙氏舊僕因忠厚轉薦沙崗高氏服役垂四十年老成可

倚歷事主人三世從無違忤主人亦優任之咸豐十一年十二月初一日聞

長槍會匪至陽武境主人與村衆謀入城暫避次日潛逃一空主人命邵偕

去不從謂有一人居守粗重器物可以無失主人猶頻囑曰瑣屑小物勿足

戀也祿佯應之及初三日羣賊盈村祿正磨麥尙未之知賊人見其馬肥壯

令除磨具牽付之祿不從賊自除牽馬欲去祿大呼曰此我主人愛物交付

與我賊子何得無禮因極力與爭賊抽刀斷其腕遂罵賊而死

以上十五名見橋卷

同治七年三月初九日擒匪過境紳民殉難者七十有四人

見橋卷

王登元小馬寨人三十九歲 石清德監生齊寨人三十五歲

姚金盛郭產角人四十八歲 姚玉坤郭產角人三十九歲

齊繼善齊寨人五十一歲

崔成保齊寨人二十九歲

靳真年靳村人六十八歲

劉牛妮李灣人三十歲

郭秉孝仲宮人三十五歲

王德年仲宮人三十六歲

王木匠仲宮人五十六歲

李來真仲宮人三十四歲

楊林仲宮人二十二歲

楊大麻仲宮人四十歲

邊長山仲宮人三十七歲

李生何村人三十三歲

李金妮何村人二十一歲

李九妮何村人二十歲

李皮妮何村人十九歲

牛金貴何村人五十歲

周欽小馬寨人五十歲

馬玲玉小馬寨人四十九歲

柴美短堤人五十四歲

朱九朝朱留橫人五十一歲

朱九臣朱留橫人六十一歲

高多枝董堤人二十九歲

楊欽小屯武生年二十五歲

賈榜盛水源武生四十四歲

郭立年小屯人三十歲

郭玉璋小屯人三十六歲

孫桂妮小屯人二十二歲

馬大治小屯人四十歲

潘雨小屯人二十歲

劉進江小屯人三十二歲

潘海小屯人三十歲

楊得安小屯人三十四歲

楊保妮小屯人二十四歲

黃季妮小屯人三十五歲

黃成富小屯人二十五歲

朱二妮小屯人三十歲

趙二妮小屯人三十歲

彭金滾小屯人四十二歲

侯貴小屯人二十六歲

孫玉會小屯人四十二歲

趙白妮盛水源人四十歲

安二妮盛水源人五十五歲

呂耕心龍化人四十一歲

趙天真龍化人四十四歲

范國珍范莊人四十六歲

張法張賈村人三十一歲

李林張賈村人三十一歲

孫迷瞪董村人十九歲

王振邦韓邱人七十歲

賈得柱小馬寨人十九歲

田節志淳子人三十八歲

李秉戌和寨人二十五歲

李勤年和寨人二十五歲

周振妮和寨人二十一歲

以上五十八人均在本村遇害

季旺季莊人五十七歲

常恆培牛廠人四十四歲

上二名在方莊地方遇害

劉溫大東關人五十三歲

劉雪妮青堆人四十歲

劉發成青堆人四十六歲

劉麻妮青堆人七十歲

上四名在北侯地力遇害

齊秉禮齊寨人七十歲

齊富年齊寨人三十六歲

齊秋成齊寨人十九歲

楊羣前吳村人四十一歲

張雨後吳村人二十九歲

王雲後吳村人五十四歲

上六名在沙崗地方遇害

楊平年淳于人四十八歲

楊臘妮淳于人五十三歲

王藍妮淳于人四十一歲

王秋妮淳于人五十八歲

上四名在淳于地方遇害

石耀先東孟莊世家子幼有胆略長習弓馬秉性豪邁不拘小節人初不之奇

也光緒三十一年南鎮謝任爲巡防營前營哨官駐扎魯山該縣盜賊猖獗搶劫公行官軍到此以勝之不易往往撫勦並用不過苟延歲月聊爲塞責而已耀先至營趙村鎮於四棵樹鎮二郎廟集諸匪或搗其穴或獲其首或俘其協從久之該防境內匪固不敢牧馬卽四鄰之地匪亦潛逃無踪是以

紳民戴德頌聲徧野上聞提陞營官以六品藍翎嘉獎焉然賊恨之入骨常欲得而甘心民國元年移防日前隊已發賊僞爲紳民感戴狀具禮環門輓留不能出入夜被執縛之柱上剖手足割股乳耳鼻耀先猶罵不絕口誓必身後爲厲滅賊賊乃拔舌剜目刳腹而殺之年祇三十有七惜哉事聞上官賜卹收骨歸葬紳民思之不已釀金建祠崇祀於趙村集寶豐官民亦宏其祠均呼爲石爺廟每遇寇難急迫祈禱亦多靈驗云

本採訪
冊纂

民國

王履堯白王村人年二十二歲幼讀書尙義氣不避艱難不畏強暴鄉人皆以王方平期之民國丙寅有股匪欲掠其村王卽持槍迎敵奈股匪人多槍如爆竹時久接應無人寡不敵衆受傷而死然因奮鬥多時匪亦受傷潛逃本

村未受巨害事後稟請縣長設位追悼轉詳上憲照章旌恤

見採訪冊

王慶才舊黃陵人性沉毅有胆略幼習武術結交豪傑志禦外侮人多笑其迂及民國丙寅地方不靖人心恐惶王慨然以掃除萑苻自許是年六月九日股匪突入該村王聞之怒髮衝冠率數人踴躍而出與賊遇以一敵百見者不寒而慄王於槍林彈雨之下往來衝突身帶重傷挺戰不已旋殞命賊亦散去鄰近諸村賴王等奮鬥羣匪潛逃未遭焚掠稟請縣長設位追悼並轉

詳上憲照章旌賞更爲之建石以垂不朽云

本採訪冊纂

賈松亭字鶴圃陶北廩生議論慷慨公正不阿民國初年充本村村長勸匪改過與之爲難某夜被匪拉至郊野肢解而死骨未全收善類奪氣

本採訪冊纂

王八劬舊黃陵貧人也年二十四歲愍而大胆遇禍不避民國丙寅七匪擾其

村王持械高呼擊賊土匪突然開火王受傷身死

見探訪冊

高占芳封邱人充河南陸軍第一師步一旅一團一營副兵民國二年八月五

日在正陽關八里塚捕匪殞命該師卹洋五十元三年年金各由本縣發三

十五元妻王氏受卹

見檔卷

劉玉山封邱縣人充河南陸軍第一師步一旅二團一營副兵民國三年八月

三十日在舞陽鹽店莊剿匪殞命該師卹洋六十元五年年金各由本縣發

四十元子四輩受卹

見檔卷

秦提中封邱人充河南陸軍第一師步一旅一團一營一連副兵民國二年九

月七日在舞陽小賒店剿匪殞命該師卹洋五十元五年年金各由本縣發

洋四十元子秦華受卹

見檔卷

張省三封邱人充河南陸軍步一旅一團一營二連正兵民國二年九月七日
在舞陽小賒店剿匪殞命該旅卹洋六十元五年年金各由縣發四十元子

月妮受卹

見檣卷

余煥章封邱人充河南親軍右營左哨什長民國四年一月七日在碭山薛口
剿匪殞命該軍卹洋六十元三年年金每次由該縣發給洋四十元子杭道

受卹

見檣卷

李潤田封邱人充河南陸軍第一混成旅正兵民國六年四月十九日在開封

病故卹洋三十五元子磨頭受卹

見檣卷

高振清塔碑人國民革命軍第三軍三十師三團一營上等護兵十七年五月
攻擊奉軍在河北省井陘縣賈莊王山被敵砲中頭部身死葬該縣桃坪卹

見檄
卷

李瑞甫充國民革命軍十三師十旅五十團一營三連正兵十七年一月守山

西五台縣長城嶺被敵槍射死葬鐵堡卹

見檄
卷

高君武小劉莊人討逆軍第三路二十九師八十五旅一團三營十一連四班

副兵十九年七月在淄河店討逆陣亡卹

見檄
卷

王得勝鳳凰台人陸軍二十師五十九旅一團一營三連中尉排長十九年六

月在山東青城縣作戰陣亡卹

見檄
卷

謝永成陸軍第二十師五十八旅一團一營機關槍連上等兵十九年七月在

山東臨淄縣關莊討逆陣亡卹

見檄
卷

劉成拾辛店人陸軍二十師五十八旅二團二營七連一等兵十九年七月在

山東青州西北馬莊擊逆陣亡卹

見檣卷

齊廣芝國民革命軍第二十六路二十七師補充團三營七連上等兵在江西

金谿縣楓山鋪勦赤飲彈身死後葬該地卹

見檣卷

姜世田姜莊人陸軍三十二軍百三十九師七百十三團通信排一等兵二十

二年四月在冷口抗日被敵炮彈炸死後葬水泉卹

見檣卷

程建元永頭人國民革命軍第二集團連長陣亡卹

見檣卷

張庭芝國民革命軍第二集團排長陣亡卹

見檣卷

徐國卿字忠甫小徐莊人孝友仁愛智勇兼全率領民團剿匪屢獲巨寇某年

十月黑夜追匪連傷數賊賊奮甚乃反攻徐及於難全社稟報縣長捐募建

祠且爲之立烈士碑云

見檣卷

溫振興尙莊人充湖北陸軍七十團三十連九棚副兵民國九年駐札新隄集

積勞病故賜卹歸葬

見檣卷

張福堂李莊人國民革命軍第七師騎兵連副兵十六年十月該軍北伐在河

北省唐縣韓莊南以傳達命令飲彈陣亡卹

見檣卷

黃林發季莊人四十六師三百七十三團迫炮連一等兵在蘭封討逆左手負

傷卹

見檣卷

李廷秀胡村人國民軍教道第二師二旅六團一營一連少尉排長十九年九

月在樓鼓作戰挂彩卹百二十元

見檣卷

趙雲山趙莊人國民革命軍第三十師二旅二團一營九連上等兵十九年九

月在黃崗李家集剿赤負傷卹銀百二十元

見檣卷

張恆培東王莊人湖北陸軍第三旅上等正兵民國五年湘西戰爭從役湖南

在麻城陽齊天界陣亡給卹金七十元遺族金四十元五年爲限

見檣卷

李金法李莊人十九歲時充陸軍機槍團一等兵民國二十二年三月在華北

抗日陣亡例卹

見檣卷

汪心清邑東北汪寨人三十歲時充陸軍十一路六十五師三百八十七團一

營三連連長民國二十二年六月九日在河南息縣李順集於匪作戰彈穿

腹死例卹

見檣卷

馬振江縣北街人充國民革命軍下士民國二十二年十月三日在豫南經扶

縣勦赤陣亡年二十有八例卹

見探訪冊纂

高占勝留光鎮人充陸軍二等兵民國二十三年在安徽立煌縣飲彈身死年

祇三十有四例卹

見檔卷

王喜慶西林莊人陸軍二十七師小炮排下士民國二十四年五月十二日在

江城南北坳勦匪陣亡例卹

見檔卷

張省三陸軍騎兵第十四旅二十八團一連一等列兵民國二十四年八月四

日在河南禹縣西南官山寨外勦斬股匪彈中頭部死例卹

見檔卷

趙中元老鴉張人陸軍第九十九師五百九十三團偵探隊中士在貴定縣掌

布勦赤陣亡卹

見檔卷

藝術

人物略六

清

莫大年字松齡號存樸邑增生賦性醇謹與人交從無蠟言樞語學有根柢字

法鐘王爲童子時卽爲邑宰書錦屏而畫之精工尤其餘事迨入庠補增益肆力於翰墨唐宋法帖無不博覽而總自成一家人云

本該家講纂

段秀字秀齋段寨人以縣案元補博士弟子員遂遊學直魯從前達講習學有進境書法工整秋闈未第設教家庭爲課子侄計後蘭封陳留開封世家子弟爭執贊焉培養多士獨蘭封生員苗得霖得其書法之精亦名重一時

本探

訪冊

袁曰辰字燦東袁芬子幼聰敏出語驚人年稍長入庠食餼工書畫諸父伯兄咸以光大門閥望之迺命途多舛屢困棘闈因絕意科第留心岐黃問症者門前車馬如市迨膺歲薦補獲嘉訓導日惟論文課士著大中圖解春秋補

註春秋輯要等書

本該氏家乘

郭鏡字振甲高士莊捷三長子弱冠以祥符籍補博士弟子員秉性剛直天真爛漫事親能以色養交友多出肝胆與邑廩生開封省議員李崑玉爲莫逆交且素抱雄心欲以功名發揮事業及國家變法停科甲開學校卽入法政肄業未終決然舍去以恐科停後斯文淪喪遂糾同人在留橫村創立高初小學校自爲該校校長其熱心教育可知未幾母病以求醫不易欲習醫而未暇及母沒在制讀禮遂潛心醫學讀濟陰綱目有得所以診視女科獨見長封開兩境全活無算治病無論何人概不受費三子修屏留橫高小畢業以程度之優留校任教員能繼父志後以匪亂積勞致疾嘔血而沒

本張鐘撰傳

纂

張省三字勉吾縣內北大街人弱不好弄父連元教之字輒不忘稍長相魁梧

性方正好讀書溺苦於學既冠補博士弟子後遊大梁書院與當時名士交學益大進既而旋返設帳於邑東羅問周軍門家有東名張雲從者以販碑帖爲業歷代名人法帖無所不購嘗主省三館中十數日不去省三因得以博覽廣搜無體不備臨池磨墨雖不及張顛之勤然較之三宿索靖碑下者利便實多况汴梁之紙不貴於雒陽無須種蕉亦不必拾葉日日臨摩遂成絕技先肆力於魏繼得力于唐最後酷嗜等慈寺又好摩擬近代黃自元戴彬元陸潤祥諸公板帖每寫一紙置之諸人帖中雖精識者莫能辨也張雲從丐其字假名刻售人爭購之又善文先是滑邑有暴大儒者名進士也號知文解組後僑於封器省三文決其必售命其子繭雲與之訂交共相切劘每一藝出繭雲輒擊節稱賞自歎弗如及繭雲以光緒己酉科選拔朝考京

官中本科鄉試翌年聯捷南宮授主事而省三依然鰓羽嗒然若喪其偶少壯功名熱心至此一落千丈矣齋雲惜之延至其家會課諸子弟讀無何咳嗽大作吐痰不止竟以積勞成疴疾旋即化去年只四十有餘

田慶茂字積善世居邑東四十里黑塔田村壽享八十九歲素精痘疹有請卽至不謀謝儀設遇貧寒欣然徒步往診遐邇不辭活人無算且其儉以自奉寬以待人因之該地人士恐其德澤湮沒隨建石於村東以期永垂不忘云

錄來
稿

高自愛字敬脩牛所人幼讀書入邑庠長習拳勇法宗少林武術諸技登峯造

極清史列方士傳壽八十有六

見探
訪冊

程永正宋程伊川先生裔也明宏治十三年遷居封邱之永頭村居焉永正通

醫術善治喉嚨疾著手回春聲名洋溢封延長滑陽等處多其足跡治法亦甚簡便祇針風風穴飲蘇油水少許施膏散藥劑亡不效是以豫北各縣均知有程醫焉且仁孝性成善事父母養生送死能竭其力親友有急莫不周濟光緒二十七年春黃風殺麥民困飢溺永正於村民之餓者給粟餬口外出者假之貲族弟永信家二十餘口倉箱告匱度日爲艱欲就食他鄉則人口多病猶少路費於萬難維持之際永正知之親診其疾朝夕往返勞苦不辭尤假以粟財日後之償否在所不計年八十有六壽終遐邇感德葬後墳頭時有珍羞之奠家人亦不知誰何也子秀儒仁孝亦如之長孫現雲省立師範畢業曾充縣立第二小學校校長暨本館採訪員該處公益多所勸助

次孫廣業承其衣鉢仍事濟世活人云

本程玉崑採訪纂

劉廷棟字國禎辛莊邑庠生幼而穎異長益勤學諸經無所不習而毛詩一經獨有神契道光十一年以第一人補博士弟子員及入秋闈屢荐不售蓋功名有定未可強也既以爲良相之志移爲良醫乃於內經脈訣本草等書苦心研究學成有得出而診視凡遇病症獨能以己意參酌而不拘拘於方書以自誤而誤人因之以醫名家求醫者戶爲之塞舉凡時令沈痼危險諸症無不着手回春人慶生死肉骨矣且素長男科並精女科蓋以讀書窮理既通陰陽之道又明造化之機所以男女兩科皆能擅長爲當時時醫所莫及封延陽三處民無夭札之憂者以有劉醫在也然廷棟雖爲醫而不忘儒術於是立文會刻善書施藥濟貧凡有善舉無不經營締造而成全之歿數十年猶令人景仰不止云

本來
稿纂

郭璋東王村人以屬行二故人皆以郭二呼之憨厚篤實少不慧而多膂力家富不務常業日與農曹樵牧伍時人未之奇也性落脫不羈隨所好而爲之某年秋後御車運鹽至中途適有捷徑因由之以取便地主見之曰此蹊徑也止容一輪車甫種麥大車一過損傷必多乃尼不放行以難之郭曰無妨卽以肩承車左使兩輪懸空兩輪着地曰此亦一轍也舉而走者數十步主人駭然謝過聽去是日氣候過暖人畜悉渴至一村欲假桶汲井飲之村人各不與郭怒挾兩石礮豎棚井口驅車徐去村衆以礙汲謀撤之先此則彼墮分之猶恐力有所偏必墜其一苦無術視郭去尙未遠追求之郭曰是不難返以兩手分撥之各打筋斗三四始止旋里適家築室以地土過黏欲雜沙以製坯郭驅車往運至村南之沙河滿載欲歸以轍被沙封驟馬四匹不

能輓郭怒除牲畜自伏車下駝數十步登岸始用驟馬輓回及村牲畜盡汗下滿地矣一日該村合議欲修關帝廟頷甃木石咸備所闕者獨窗櫺一事郭曰木窗不若石窗之堅而耐久也我請爲若運之無何果於濟縣大伾山籠担石櫺二往返二百餘里一日而至統計不下百鈞其有力如虎若是惜當時之將無趙范其人不得與呂文德媲美後抑鬱不得志疽發背死

見探訪冊

孫倉字貫千縣東北溫莊人老籍潘店集望族自其父移至溫莊家亦稍裕因家無人棄文習武從牛所高山遊盡得其術稱絕技同治七年長槍會匪竄封至其村村人逃盡孫在家看守賊千餘圍其宅欲誘之降孫不從而無術能脫旣在厩解馬韁執其尾闔之出超騁而逃賊衆莫敢禦孫之村有溫某孫少時同硯友也素聞人言孫身皮膚堅硬齒不能入異之而未之試也麥

天孫之郊憇於古墳柳陰下側身臥實未睡也某遽至齧其股格磔一聲鮮血迸溜而門齒落其二孫性懈惰好詖諧同輩與狎者甚夥中秋節孫攜籃入市村人某施從之孫知之而未言也人暴至以指挖其醫孫輕收其尻骨指不得屈隨之行者數步及出之指暴腫如蠶螫者寸許數日乃瘳孫之遺事類此者不一而足無暇細載當時有李黑馬者與之齊名

李黑馬者邑東高產角村人也無名字面黑小字馬故村人皆黑馬之其人無恆產無妻室幼喪父母長自食其力爲孫教師貫千傭工卽收爲弟子農暇則習藝數年盡精其術後旋里爲人談拳勇人亦未之奇也嗣因歲荒就食南陽南陽一帶羣盜出沒多刀客白晝劫人商旅不行黑馬乃出爲商旅保標保標者衆行旅釀錢聘請拳勇高手以保護其資貨者也黑馬所至盜賊

屏跡數十年商旅無失一物者因是南陽道上黑馬之名大噪計黑馬出遊
今已三十餘年未嘗還亦未嘗來一紙其鄉人有自南陽來者故得略陳其

梗概如此

邑人黃
陰耕讓

齊鑾縣東齊寨人與仲兄鏗俱精武術鑾力遜于鏗而藝過之該村行商賴其
力以脫險者不一而足鑾侄雙喜狀貌雄偉人未知其無技也同治戊辰捻
匪擾封鑾令侄武裝負劍率衆避亂沙崗寨已衣敝帽氈持大刀殿之至村
北適賊五六騎遇賊懼雙喜勇武不敢犯輕鑾老且欲得其刀乃以銃直射
鑾面鑾急俯首丸中帽墮地賊給之曰朋友帽落矣鑾云生死之際帽何惜
焉賊爲鑾術莫測乃舍之去復走數十武遇一賊首跨馬持長槍有萬夫莫
當之勇且後邊隊伍絡繹不絕衆皆失色鑾行若無事然及近賊舉槍卽刺

鑾飛身躍賊前以刀加其項賊驚呼曰好朋友莫動手鑾應諾且云吾不傷汝者爲民衆耳乃收刀擁衆而北賊亦東去是役也鑾可謂智勇兼備不特爲該村民衆之保障實一方之干城云

本齊輯五
採訪纂

民國

陳希中字和卿縣東北潘固人也幼與兄金山均從侯福成習國技長精其術以之教學於外初鄰村而四方不數年間普及封開兩境蔓延五六十村及門受業者一兩千人慕其技而私淑者不可勝數民國十五年夏土匪吳秀山等據吳寨村廣邀黨徒窺伺封城萬民逃避十村九空希中命其徒劉信率諸同志佐縣長畢殲滅之官以民需其惠委希中爲人民自衛武術隊總隊長嗣後每遇勦匪強半資乎其力希中術宗海川錘屬八卦要旨在重節

義輕生死排除情懦貪欲爲邦國犧牲其身家而種種技藝尤所時習且心氣和平誨人不倦富者不要資貧者不見拒有樂從其學者縱已佃田自給得傳其教亦所必爲茲年近古稀猶常騎驢循視施教各地而督察之子憲成相成俱精其術能承衣鉢將來成就不可限量其弟子劉信等及其鄉鄰

勒諸貞珉昭茲來許

本李紹唐撰碑序墓

張之幹字國垣李莊清庠生熱心教育設館授徒循序善誘且通岐黃行醫四方不分貴賤延無不到雖祈寒暑雨不之惜得其診治絕而復蘇者不可枚舉診金謝儀悉辭更喜褒善戒惡表正風化種樹洒掃提倡衛生現年九十

有五猶行不持杖疾走如壯年

本鄭元三採訪墓

朱金壘朱莊人與子道平孫芝生三世名醫活人無算

見採訪冊

耆壽

人物略七

清

汪國鼎字漢臣汪賈村人百有四歲嘉慶己未勅旌德壽坊褒云熙朝人瑞一
聯云瑤池喜進千年果海屋欣添百歲壽又一聯云錫月帛有三養兼五豆
六豆歷寒暑維百年逾杖國杖朝

王天玉字和璧王王村人恩賜德壽耆老孝父母敬兄長睦鄰里恤貧困道光
十五年卒享年八十有三遐邇稱頌邑紳邊青藜既爲之序三週致悼縣教
諭楊鴻漸更篆誄章以揚之

劉悅留橫人嘉慶三年生壽九十有六

齊秉孝字奉先齊寨人嘉慶二十年生三賜耆老壽九十有六

黃守德黃寨人嘉慶九年生壽九十有四

谷長重西守宮村人恩貢卒於光緒二十年壽九十有二

王魁元字冠羣小魯崗人生於嘉慶六年同治光緒紀元均賜耆老壽九十

齊萬順齊寨人光緒三十三年卒壽九十有七

郭法鄧寨人壽九十有七

朱楹西蒿寨人壽九十有六

劉振隆留橫人壽九十有五

朱剛東蒿寨人三賜耆老少鰥不娶有養生術壽九十有二

李保字慶甫和寨人三賜耆老壽八十有七

朱連元西蒿寨人恩賜耆老老年童顏至老不衰壽八十有五

齊向榮齊寨人光緒二十三年卒壽八十有四

季永富尙莊人文生季樹聲之祖父光緒二十四年卒壽八十有四

程子章永頭人光緒三十三年卒壽八十有四

蒿永發蒿寨人光緒二十七年御賜耆老精針砭術壽八十有二

李景順和寨人卒時年八十有二

王平安白王監生公贈年高德邵匾額又有行述碑壽八十有二

陳繼舜字紹虞東王村陳子懋之祖父生於道光九年壽八十有二

曹自安曹寨監生光緒回鑾時賞給銀章有行述碑壽八十有二

齊顯榮字華亭齊寨人光緒二十四年卒壽九十有六

王金城字德固縣北周莊王化三之伯父宣統元年卒壽八十暨弟金玉化三

父民國九年卒壽七十有九

王均字平甫張莊俊秀訓蒙終身不懈培養人才頗多壽八十

郎清源蒿砦人光緒二十七年御賜耆老壽八十

呂瑞雲大山呼人光緒二十七年御賜耆老壽八十

歐興旺于寨人精武術在外保標二十餘年壽八十

以上見採訪冊

民國

徐夢麟字兆盛荊隆工徐子鎔父清賜三次耆老九秩榮慶鄉里敬贈德重志

老匾額民國九年卒壽九十有六民國十二年四方猶勒石紀念

王峻嶺大里薛人王桐之伯父卒於民國二十二年壽九十有二

吳國良閩產角人民國十九年卒壽九十

衡學字習之東大工民國十八年卒壽九十有二

程永直永頭民國二十四年卒壽九十

齊超齊寨民國十六年卒壽八十有九

杜芳字春農杜莊人清文生民國十八年卒壽八十有九

齊文明字濟哲齊平長子公贈望重鄉里匾額民國二十五年卒壽八十有五
韓明山韓莊人善推拿術遠近相邀無不立至全活甚多均辭謝儀民國二十

五年卒壽八十八

范清德字照明張郭村范長恩之祖父有德行碑民國八年卒壽八十四

衡自琴以字行西大工人生而天齋好靜喜佛民國二十五年卒壽八十有四
楊鳳鳴字岐山北場民國十五年卒壽八十有四

楊鵬鳴字九天鳳鳴季弟民國二十二年卒壽八十有四

孫明字哲甫孫大工人孝友孀篤弟早夭視侄輩逾己子民國四年卒壽八十

有四

祁清源東吳村人民國十三年卒壽八十有二

楊鶴鳴字九臯鳳鳴弟武生民國十五年卒壽八十有一

馬明豆腐營人民國十一年卒壽八十

張梓張淑身之祖父民國十七年卒壽八十

劉金德張郭村劉志學之祖父民國二十一年卒壽八十

萬德麟萬莊萬聞善父現年九十有三猶甚康健精岐黃施捨營丹

張連登字朝閣東王村清武生現年九十有二

張玉祥張郭村人現年八十有九

邊長逢王王村人現年八十有九

張明遠東王村人現年八十有八

齊讓齊寨人現年八十有七

張振聲東王村人現年八十有七

張涵東王村人現年八十有五

陳天香王王村人現年八十有四

齊端齊寨人現年八十有四

陳書齋字寶森東黃村營清庠生通於醫有德行碑現年八十有四

劉登榜劉王村人現年八十有四

王金山和寨王德之父現年八十有三

孫啟字黃陵集人清文生現年八十有三猶充教員皓首勤學鬚髮皤然

王廷楷王王村人清文生現年八十有二

李銓和寨人現年八十有二

朱兆鳳張光人清武生現年八十有二

張柱縣北街張國慶之父現年八十有二

王化同大馬寺人現年八十有一

齊廣和字協中倫生父也性孝友少讀書三年棄學就耕既長深以爲憾見有唱歌編辭者欣然羨慕聞見輒記之久而智益廣識益增於夏日柳陰之餘冬夜牛燈之下說孝賢以諭家人歌分秧以課農夫且憐孤恤貧力行慈善

民國二十四年紳民曾建碑以誌其德現年八十一行不執杖矍鑠逾常人仍手不釋卷引吭歌咏著有雙玉環小說十八卷爲時所傳誦
謝書堂段莊人現年八十